

那些年，我等待的那個男孩子

作者: 蛋撻王子

Powered by [紙言](#)

1

每一個人，都會有初戀。

學生時代嘅初戀，永遠係最甜，大家眼中只有對方，傻到為對方做任何事。但往往初戀都係傷得最痛，流淚最多。

我比較特別嘅，我嘅初戀情人一早出現左，其實都唔知係咪初戀，可能只係我對佢嘅暗戀

但係我可以為佢呢個男仔，放棄好多野，為左一個初吻，而暗戀佢好多年，就算見唔到佢，我仍然係鍾意住佢.....

「哈哈哈哈!!!!微波爐呀!!!!」

「你...你咪再搞我條辮呀!!!」

「妳扎條仔辮唔係預左俾人咁玩架咩!!!行呀!!!」

呢個男仔每一日都要整鬼我，搵下我對仔辮先安樂，不過我又好鍾意同佢玩。佢份人好有正義感，雖然成績差左少少...都唔係少少...活躍左D...其實唔止一DD...但係只要佢身邊朋友需要佢幫手時，佢永遠都唔會拒絕人地。另一方面，佢又非常細心。

第一次見佢，係小學三年級。佢係隔離班嘅同學，有一次佢個水樽碌左過我到，我幫佢執返，佢好似呆左咁望住我，我亦對佢微笑。自從果日開始，佢就經常排我隔離，我同佢之間，有兩米距離...

我同佢相識於三年級嘅課外活動，佢係唯一一個去學整麵包同蛋糕嘅男同學，其他男同學都揀踢波、打籃球之類。對佢產生好奇心嘅我，就決定走去同佢一組。

2

「各位同學，而家大家可以試下搓麵粉啦」當老師講完呢句說話之後，大家都好開心咁搓麵粉，我打算整個麵包返屋企俾ba b同媽媽食，仲有我K2嘅妹妹。Ba b返工好叻架，其他人見到醫生係渣車住大屋，個個都以為醫生係好舒服嘅工，但我就知道ba b其實係好辛苦，on call 36小時之後，佢返屋企仲要進修讀書，一黎佢想換間大少少嘅屋俾我地，二黎聽媽媽講，ba b想出黎自己掛牌做私家醫生，抽多d時間陪下我地。所以我都做個乖乖女，盡量唔去打搞ba b同媽媽。

「唏!!唏!!」我自己不停係到搓麵粉，搓得非常起勁，而佢，就係我隔離睇住我整麵包

「你唔試下整嘅?」

「我?我成日俾家姐捉去幫佢手整麵包，我整慣晒」

「你家姐?佢整俾你食?」

「傻啦，佢F.2架啦，不過佢家政有時要整麵包，會捉埋我幫手囉」

「哦...咁你可唔可以幫我手一齊整麵包?我想整俾屋企人食」

佢望左我一陣「好啦，見係妳咋，就幫下妳啦」

我聽到呢句說話時有D開心，所以我就用手肘撞左佢一下「唔該晒你喎」

忽然，佢伸隻手黎摸一摸我塊面，我個心突然跳得好快好快，當佢隻手掂到我塊面果時，個心痛左一下

「妳呀，小心D啦，D麵粉彈到成面都係啦，唔靚女啦，林雪凝」

原來...佢知我叫咩名...

「你...點知我個名架?」

「同妳一組點會唔知妳叫咩名呢，妳係3C班林雪凝，每次測驗考試都拎第一」佢係我面前微笑咁講，其時我心跳愈來愈快

點解...佢會咁清楚我嘅事?佢同我一齊搓麵粉，有時我地雙手仲會掂埋一齊，我望住佢認真做野個樣，忽然知道左一件事

我第一次鍾意左人，第一次鍾意男仔，我鍾意左呢個隔離班嘅同學，佢叫Leon，程逸風。

3

「喂，我整果d麵包送埋俾妳丫，妳話妳要整俾屋企人食」

「咁你呢?你唔洗俾屋企人食架咩?」

「家姐同媽咪會整野俾我同爸爸食架啦，我果d俾埋妳啦」

當佢俾埋佢整嘅麵包我果時，我都做返個回禮

「呀...我請你食一個麵包丫，我呢到多左個」

「請我食?真係冇問題?」

「嗯」我微笑對住佢

「多謝妳」

我同一齊佢步出校門

「家姐!!!」我個妹妹走過黎攞實我

「妳妹妹好得意喎，小妹妹，妳叫咩名?」佢摸住我妹妹個頭，彎低身望住佢

「我叫林雪晴，今年4歲，讀K2A班」

「個勞作咁得意嘅?妳係學校整架?」

「送俾家姐架」

「佢真係好得意喎，我可唔可以抱下佢呀?」

「可以呀」

阿風抱起我妹妹

「哥哥我好鍾意你呀」

「我都係呀雪晴妹妹」

「阿風!!!返屋企啦!!!」黎接佢嘅係一個著住白色連身裙，領口有四粒紅鈕嘅大姐姐，果個應該係佢家姐啦，姐姐讀果間中學，係我其中一個目標之一。佢家姐生得好靚，有一把及膊嘅頭髮，扎成一條馬尾辮。而佢姐姐身邊，有一個K3左右嘅小妹妹係到

「女同學呀細佬?」

「唔通佢係男仔?」

「衰仔!!咁串我?」姐姐推左下阿風個頭

「姐姐妳好，我係佢課外活動嘅同組同學，我叫林雪凝」

「乖啦，我係程逸風個家姐，我叫程逸怡，我細佬有冇蝦妳呀?」

「冇呀，佢好幫我手架，我整左D麵包，姐姐我請妳同妹妹食一個丫」

「多謝妳呀，詩敏，同姐姐講多謝啦」

果個K3小妹妹對住我笑住講「多謝姐姐」

「妳叫咩名呀?」

「我叫張詩敏，今年5歲，我讀K3A班」

「唔?姐姐妳唔係姓程架咩?」

「詩敏係我地契妹黎架，好啦，阿風詩敏，我地返屋企啦」

「拜拜姐姐」眼前呢個K3小妹妹真係好得意好可愛，佢甩開姐姐隻手，拖實阿風慢慢咁行，佢地三個人一齊上左一部私家車上邊，車頭應該係坐左佢地媽媽同朋友，而車上有一個校章，果間學校我一直都好想入，西區所有女仔嘅中學目標，英華女校。

即係呢兩姊妹可能同英華女校有關係?

林雪凝日記(1)

17-5-199X

今日係課外活動，我期待左好耐啦，因為我一直都想試整麵包，尋晚我仲開心到瞓唔著。落堂之後，我跑去指定課室等老師黎，我一入到去，就見到有個男仔係到，竟然有男仔會黎上家政麵包坊，好奇心令我走去點名果時睇下佢叫咩名。

佢係隔離3D班嘅程逸風，我終於知道佢個名啦，雖然佢日日排隊都排我隔離，我同佢之間有大約兩米距離啦，因為我係3C班。

一開始，老師就要我地分組，我怕佢冇組，所以一開始我就走近佢身邊，同佢一組，原來佢知我叫咩名架!!!搞到我有D怕羞添。

搓麵粉果時，我搓得太開心，成面都係麵粉啦，於是佢就幫我抹左下面。

突然間心跳好快，我望住佢，佢對我微笑，然後我同佢一齊搓麵粉整麵包。

係過程中唔知佢有心定冇意，佢經常捉住我對手，但我又由得佢捉住我對手一齊搓麵粉。

原來佢有個家姐架，姐姐叫逸怡，怡姐姐係聖嘉勒女書院嘅學生黎架，佢一套白色校服加四粒紅色鈕真係好襯佢，姐姐真係好靚女呀!如果我生到好似姐姐咁就好啦，

佢地仲有個同雪晴差唔多大嘅契妹，眼仔大大咁好得意架。

死啦...佢請我食麵包果陣我好開心呀!!!佢捉實我雙手果陣個心跳得好快呀!!!!

我鍾意左呢個男仔呀!!!!唔可以俾屋企知架!!!3年級就鍾意男仔...會俾ba b鬧死架!!!

不過我唔講，佢又點知呢?haha!!!

4

轉眼間，我升小四了，好期待四年級會同D咩同學一齊上堂，然後，佢嘅出現，令我個心跳得好快，原來...佢同我同班

「Hi，今年我同妳同班㗎」

「你好呀...」

係小學期間嘅我，係經常俾男仔蝦嘅對象，因為D男仔蝦女仔嘅原因只有一個，想吸引果個女仔嘅注意，因為佢地正正係鍾意果個女仔先會蝦佢，而小學時期蝦我蝦得最多果個就係佢，程逸風。

「微波爐!!!」

「做咩呀!!!」

「冇呀!!!今日未搵妳條辮，快D過黎!!!」

「唔俾你搵呀!!!一陣搞到我冇頭髮咁點呀!!!」

「咁我自己黎搵啦!!!」

每日我同佢係小息都上演呢套鬧劇，而佢因為經常蝦我而俾老師寫手冊。不過對佢完全冇效果。佢總係要笑下我平胸，搵下我條辮先安樂，所以有一次我向佢反擊，我聯同幾個女仔一齊捉住佢，再搵羽毛球拍打佢，當我一手拍落去時，佢舉起左手一擋，就出現左“咁”一聲。佢雙眼望實佢左手上嘅錶，而我都知道自己可能闖左大禍，我將佢隻錶整爛左。

「對...對唔住呀...」

佢一聲不發，紅晒眼咁除左隻錶走左返自己個位到，果日之後，佢就冇同過我講野，亦有黎整估過我。果幾個月，阿風精神變得好差

「好悶呀...阿May呀，點解最近好似冇咩笑聲咁嘅?」

我當時嘅英文名係阿May，因為果一年，阿風係台上以一首黎明嘅“夏日傾情”吸引左唔少少女同學嘅注意，當時傻傻地嘅我，為左襯返佢，而將英文名改做阿May。雖然佢成績冇咁好，又極為好動，但佢都吸引到唔少少女同學，係我果班之中，以我所知，有兩個女仔係鍾意阿風

「可能佢地玩厭左啦掛，成日黎整估我地幾個」

「咪係囉...四年級嘅女仔平胸有咩出奇㗎!!」呢個係Ada，佢係其中一個鍾意阿風嘅女仔，有時當阿風黎蝦我果陣，Ada會挺身而出黎保護我，實際上，佢想同阿風多少少互動者

「一陣上數學堂，又要悶一陣啦」

「悶完咪放學囉，不過妳返屋企都係溫書做功課架啦」

「難得個妹瞓左覺，當然係做功課溫書好時機啦」

「不過妳唔睇電視架咩？」

「唔睇架...溫完書我就睇小說架啦」

「林雪凝妳真係一個書蟲黎架」

“鈴鈴鈴鈴鈴.....” 小息完嘅鐘響起，大家都返入課室，上數學堂

大約去到一半左右，校長同班主任衝左入課室

「起立....」

「唔洗...大家坐低!!!」

校長好快衝去阿風身邊，再帶佢出課室。我係窗口望出去，校長陪佢上左部的士。

「嘩...咩事呢?好似好急咁喎」

數學堂落堂果時，老師幫阿風執好書包。我地班主任將阿風個書包交俾兩個同佢家姐同校嘅大姐姐，佢地雙眼都係通紅，然後我就見到我地兩位班主任連同兩個大姐姐一齊搭的士離開。

當日嘅班主任課，由隔離班嘅副班主任代為上堂，因為係星期五關係，大家都好希望可以快d放學返屋企休息

到左星期一，阿風冇返學，冇人問過佢點解缺席。大約兩星期後我係放學果時，去教員室拎功課俾老師之時，發現上次私家車上邊一個姨姨係到，佢散發出好強嘅氣，另外有兩個同怡姐姐同校嘅姐姐係到

「星期五晚，希望兩位班主任同校長可以早少少到，送我地嘅朋友最後一程」好強氣勢嘅姨姨對住我地班主任講

「冇問題Miss孔，在公在私，我地都會陪住程先生行完最後嘅道路」

「麻煩晒兩位啦，聖嘉勒妳地呢?有幾多人會陪逸怡逸風?」

「陪住阿風?」我係到邊聽邊諗

「Miss孔，我地校長同班主任會出席，另外我地全班同學都會去陪佢地兩姊弟，始終...程叔叔好錫我地班...」

「麻煩晒妳地」

「Miss孔...咁佢地三母子而家...」

Miss孔背住佢地講「我地英華女校出黎嘅人，唔會咁易就會被失敗打低，Sally非常堅強，佢要樹立榜樣俾對子女睇，Tony果時都好堅強咁作戰，雖然佢輸左，但佢係作戰到最後一刻」

但係佢講呢番說話時眼有淚光，佢亦發現我嘅存在

「同學!!!妳係到做咩野?係咪偷聽!!」呢位Miss孔嘅氣場將我完全鎖死

「我...我...」一時間我俾佢嚇親，我將功課同升中資料跌左落地下

「吼.....」Miss孔就好似一隻獅子盯住佢嘅獵物咁望實我

「雪凝?妳黎教員室咩事?」Miss Lau終於發現我

「我...我黎放低功課.....」此時我已經嚇到想喊，同時Miss孔已經見到我本升中學嘅資料，佢執起黎睇，資料中，我Mark低左英華女校為我第一志願，第二係聖嘉勒

Miss孔睇一睇我本升中資料「同學，妳叫咩名」

「我...我叫林雪凝，係程逸風同班同學」

「妳想入我地英華女校係唔係」

「係.....」

「咁妳認真我!我就係英華女校嘅訓導主任!」

「係...係!」

「妳聽到d咩?」

「我聽到...大家會去送一個叔叔最後一程」

Miss孔望一望Miss Lau

「雪凝跟我黎丫」

「係...」

我跟住Miss Lau行埋一邊

「雪凝...唔...點同妳講呢...我知妳成日同程逸風鬧交，佢又成日整估妳...不過我希望...」

「Miss Lau...我應該知咩事...果兩個聖嘉勒女書院嘅大姐姐...係逸怡姐姐嘅同學，我認得套校服，阿風屋企...應該係有...白事?」

「嗯.....我希望妳可以保守呢個秘密，最近逸風已經冇返學，妳可以幫到我守呢個秘密嘛?」

「可以!!」

「乖啦，頭先果個係英華女校嘅老師，至於點解佢係到呢，妳就唔好問咁多啦」

「知道」

阿風....爸爸過左身，我需要點做呢...可能我可以做嘅，就只係陪佢身邊。到左星期一，佢終於都返學，係左邊心口上，有條小小嘅黑紗。

6

小息時，佢一個人坐係操場低頭，佢好靜，完全唔似平日嘅佢。

「嘩...我係咪眼花呀?程逸風竟然自己一個坐埋一邊呀?」

「嗯...可能佢有心事呢」

「咁阿May妳去開解下佢啦」

「妳唔係鍾意佢咩?妳唔去嘅?」

「我換左畫lu~~~」

小學時代，我地d女同學換暗戀對象係快過賽車，上畫鍾意人，下畫就可以好憎人

於是，我就坐係佢身邊，靜靜咁陪佢

「我知道晒啦，你最近點呀?平伏左未?」

佢擰擰頭

「我陪住你好唔好?」

佢靜左好耐...「我係個壞學生，妳陪住我...妳唔怕俾人話咩?」

「你邊到係壞學生者...你只係讀書冇咁叻，不過我相信你，你嘅能力唔止咁少」

「點解妳咁信我?」

「因為我鍾意同你玩囉，你蝦我都係貪玩者，我唔會信你會鍾意我先蝦我」

然後，我偷偷地拖起佢隻手

「無論你變成點，有咩事都好，我都會係你身邊陪住你」

佢聽到我咁講之後，我第一次聽到佢咁同我講野

「多謝妳雪凝，如果10年之後，我地仲係認識，仲記得對方嘅話，我會娶妳做老婆」

「你...你娶我?你傻架咩，我都未同你拍拖」

「妳心地好，又善良，我未同妳拍過拖都想立即娶妳啦」

「10年後先算啦，或許...10日後你就鍾意第二個女仔呢」

佢望住我笑一笑，係果排，我每日都陪住佢，直到佢同以前一樣為止

林雪凝日記(2)

17-2-199X

死人程逸風!!!我都唔知鍾意佢D咩呀!!!無啦啦同D男仔一齊幫我改花名，叫我做微波爐!!!喂呀!!!小學4年級邊到會有女仔係大胸架!!!正一衰人黎架!!!

佢又成日搵我條辮，痛架!!!!

今日派小測嘅測驗成績，我又考第一啦，ba b又有獎勵俾我，今日我要ba b買左本小說俾我睇，佢見到我睇小說果時都嚇親，點解個女會睇呢d科幻小說?其實我好鍾意科學架，可能世上真係有原醫生呢d咁有冒險經歷嘅人呢。

Ba

b今日佢都買左本英文小說睇呀，佢話係醫院有時好叻，又馴唔著，就會睇下小說減壓，不過佢又點會馴唔著呢，醫生係世上最鍾意馴覺嘅生物呢黎架，做醫生真係好辛苦，所以我將來我都係唔好做醫生啦。不過ba b好似想自己開診所，抽多d時間陪屋企啦。

19-2-199X

死啦!!!我今日同幾個女仔貪玩，向程逸風反擊，我地捉實佢，再用羽毛球拍去拍佢。點知我唔小心整爛左佢隻錶呀!!!!佢每日都拎住隻錶係到較時間架。我整爛左佢隻錶之後，佢返左埋位好唔開心咁，佢會唔會黓左我架?死啦.....點算好呀?俾自己鍾意嘅男仔討厭呀.....

20-3-199X

自從上次我整當左佢隻錶之後，佢就冇黎搵我條辮啦，其實我有D唔慣。以前每日都同佢打打鬧鬧好開心架，但係呢個月佢都靜靜地自己一個人，又唔理我，但係冇理由要我自己去同佢傾計架嘛。

所以我就嘗試叫Ada去同佢傾計啦，其實Ada鍾意阿風，我係知道架，阿風好似唔想同Ada講野咁，睇黎佢真係好嬲啦

22-3-199X

今日阿風又係自己一個坐埋一邊，佢好似好叻好叻咁樣，我真係想知佢咩事

係上緊數學堂果陣，校長好快帶左阿風上的士，落堂果時有兩個中學大姐姐黎幫阿風執好書包，然後就同我地班主任一齊搭的士走左

果兩個大姐姐雙眼紅晒，應該係喊過黎。唔通係怡姐姐有事?

但係我又冇阿風屋企電話...就算有又點呢...佢黓左我

15-4-199X

今日我放學之後，拎全班功課去教員室。呢個係班長嘅責任黎架

去到教員室我又見到兩個聖嘉勒大姐姐，今次仲有個氣場好強勁嘅姨姨係到，佢以為我偷聽佢地講野呀....佢望住我果時，我真係全身都震晒，原來佢係英華女學校嘅訓導主任，死啦...我第一志願就係英華女校.....

今日我先知道，阿風爸爸過左身，就係上次校長帶佢走果一日。

19-4-199X

阿風最近經常缺席，今日佢終於返學啦，小息果時佢坐埋一邊。於是我鼓起勇氣坐埋佢身邊陪佢，呢個時候嘅佢，係最需要朋友陪佢，更何況...我自己鍾意佢呢

今日我偷偷地捉實佢隻手，同佢講我會陪住佢。佢果一下對住我微笑啦，佢唔係強行微笑，係用心笑出黎。

佢竟然應承我，如果10年之後，我同佢仲係朋友，仲記得對方嘅話，就會娶我同我結婚，我聽到之後好開心啦。

林雪凝妳傻左咩!!!!4年級就想嫁人!!!!

7

轉眼間，我地就快小學畢業，我地學校安排左個宿營俾我地畢業班

係個camp內，好多男仔對心儀嘅女同學表白，因為大家相處機會唔多。而我都有俾人表白過，我亦都拒絕晒佢地，始終...我由三年級果陣，就鍾意左果個男仔

我同佢最親密果張相，正正係畢業營中影嘅，我係鞦韆上坐低，而佢就係我身後，雙手按住我膊頭，我同佢面貼面咁影左張相，渣機嘅係我地班主任楊sir，佢影相好叻，捕捉畫面係非常之好。

畢業營最後一晚，佢自己坐係到睇星

「你自己一個唔悶？」

「微波爐?妳自己一個人？」

「唔...見你瞓唔著，睇下你咩事」

「呢兩年...無論我點蝦妳...妳都咁關心我」

「始終...大家都係同學...」

「多謝妳」

「做咩係到睇星星?你鍾意觀星？」

「爸爸...以前經常陪我睇星星，經常帶我去機場睇飛機，每次係九龍城見到飛機飛過，我都會好開心」

「你仲好掛住叔叔？」

「點會唔掛住，我睇下，爸爸變為邊粒星，係天上守護住我地一家人」

「不如...我陪你睇？」

「妳唔怕...我地有緋聞？」

「我地兩個點會有緋聞?我地大纜都扯唔埋」

果晚我係佢膊頭上一齊睇星，當我打開眼時，我係女仔房入邊

「嘩!雪凝!!尋晚係程逸風預妳返黎啲」

「妳同佢拍拖呀？」

原來...我去到兩點果時瞓左，阿風就預我返房

終於到左升中派位果一日，ba
b已經自己出黎掛牌做私家醫生，所以佢唔可以唔返診所，媽媽成為助護之一，所以我就自己一個帶住雪晴返學校睇結果

Lam suet ying.....Ying Wah Girl'S School 林雪凝.....英華女學校

第一志願呀!!!!我派到第一志願呀!!!

「嘩!!家姐!!妳有第一志願啫」

「係呀!!!所以妳都唔洗擔心啦!!!!家姐幫妳考到間好好嘅中學啦!!!!」我開心到抱起雪晴係到轉
拎左派位結果，我就帶雪晴返診所同ba b媽媽講我嘅結果，好奇怪，係課室內唔見佢

可能我同佢緣份已經完左啦，我同佢...就當係一個回憶啦

當我同雪晴兩個人離開學校果時...佢追住我地了

「妳...妳可以等一等我嘛?bb豬」

拖住妹妹嘅我轉身望一望佢

「bb豬?你...叫我?」

「係...我...有樣野想送俾妳...今日之後...唔知仲見唔見到妳」

「送野俾我?你成日蝦我，又...又叫我做...」當時嘅佢面紅紅頭耷耷好怕羞

「我知妳入到間Band 1中學...而我就...所以...今日我想同妳講清楚」

「呢...呢隻公仔...送俾妳」

「咁得意嘅...呢隻係...」

突然佢捉住我雙手，然後錫落我個咀到

兩個咀痴埋一齊，心跳同呼吸突然加速

「我鍾意妳...」

「下?」

「雖然我讀書唔叻，我襯唔起妳...但係...我真係好鍾意妳呀!林雪凝!!!」

佢講完之後就轉身走左，我呆呆咁企係到

佢...對我表白?佢...鍾意我? 原來我一直鍾意嘅男仔...佢都鍾意我?

「家姐...家姐!!!」

「係...係!!!」

「開心呢?俾鍾意嘅人錫左啖嗰」

「邊...邊有呀...」

「咁妳銀包張相呢...果個明明就係佢...」

「妳...妳咪多事啦，我請妳食雪糕啦」

估唔到，係果日之後，我就再冇見過佢，應該話佢同我冇重遇過，即係我見到佢，佢又唔認得我咁樣

林雪凝日記(3)

20-6-199X

今日係學校畢業宿營最後一日啦，5日4夜嘅宿營好唔捨得啦。夜晚我發現阿風自己坐左係草地上抬頭望星星，於是我就坐係佢身邊陪佢一齊睇星星。

佢仲好掛住佢過左身嘅爸爸，雖然阿風成績差，但係佢係一個好人黎，我始終覺得佢嘅能力唔係反映係成績表上邊

果晚我第一次雙手撓實佢，個頭挨住佢膊頭，我感覺到佢錫左我額頭一下，我同佢一齊睇星星，然後我瞓著左，佢就預我返女仔房

18-7-199X

今日係升中派位啦!!!一如我所願，我派到第一志願!!英華女學校!!!我仲幫雪晴入埋英華女校啦!!!計返應該到我F.5果年，雪晴就會F.1入學，計到剛剛好。

阿風呢?冇人見過佢，於是我就拖住雪晴，有D失落咁離開學校

點知突然間佢追出黎，送左隻公仔鎖匙扣俾我之後...之後佢...佢捉實我雙手，錫左我個咀一下

果一刻我同佢都合理雙眼，唔知我地錫左幾耐啦，我好唔捨得咁放開，然後佢同我表白...原來佢一直都係鍾意我

不過佢同我講完之後，就走左去

即係算點啲!!!錫完我就走，你知唔知我都鍾意你架!!!我個初吻就咁俾你拎走左啦!!!死人頭!!!我想應承你架!!!你走左去，我又點嫁俾你呀!!!

死人頭!!! 死人頭!!! 死人頭!!! 死人頭!!! 死人頭!!! 死人頭!!! 死人頭!!!我憎死你呀!!!!

其實我都好鍾意你架.....

“嗶嗶嗶嗶!!嗶嗶嗶嗶!!!”

新學年開始啦，我換上寶藍色長衫校服，扎左一對麻花辮，扣上校章，我終於去到第一志願到讀書啦
準備出門口時，望一望佢送俾我嘅羊駝公仔鎖匙扣，我望住佢，佢又望住我。於是我將呢隻粉紅色羊駝扣係書包上，佢陪我一齊上堂返學

升左中學嘅我，已經搬左去舊居附近一個新落成嘅屋苑，ba b都買左個小鋪位去開左間診所。

我落左巴士之後，就見到好多同我一樣著長衫嘅同學一齊行返學，不過呢d師姐一去到學校附近就開始緊張起上黎，愈近學校佢地就愈緊張，而當我踏入校門果時，我再一次遇上佢

「妳!!點解唔扎好辮!!!」 「妳!!!頭髮做咩咁亂!!!」 「妳!!冇冇熨好校服!!」

係我眼前出現左呢個訓導主任，就係我4年級係學校遇上果一位，我俾佢嘅氣場再一次嚇到企定定
有一位大師姐拍一拍我膊頭

「小妹妹，妳係中一新生呀？」

「我...係呀...」

「果個係Miss
孔，我地學校嘅訓導主任，綽號恐怖雞，妳校服著得唔好，會俾佢當眾用獅哮功鬧架」

「知...知道啦...唔該大師姐」

大師姐望一望我套校服

「嗯...妳著得幾好，冇咩問題，妳放心返學啦」

「唔該晒....」

「我行先啦，拜拜」

當我行入校門時，已經見到不下二十個師姐罰企係到，俾Miss孔捉緊佢地校服，正當我以為自己可以逃脫果時.....我先知道，我仲慘過中獅哮功

「西區官立小學升上黎果位同學!!!林雪凝!!!!」

「係!!!」

Miss孔咁樣一講，我就吸引左全部師姐嘅目光

我耷低頭，完全唔敢望Miss孔

10

佢上下打量我套校服，係到不停搵錯處，而我就俾佢嚇到腳震

Miss孔連我對麻花辮都檢查埋

「幾好，第一次著校服著得唔差」

「多...多謝Miss孔」

「妳真係做到，第一志願入黎我地學校」

「係...」

「不過我2年前已經估到，林雪凝，西區官立小學，連續6年全級第一、模範生，妳咁樣，好難入唔到我地學校」

「多...多謝Miss孔，我...返課室先啦」

當我想行開果時...我俾佢叫停左

「咪住!!!」

「係...」

Miss孔指住我書包果隻羊駝公仔「扔左佢!!!學校唔俾學生書包上掛飾物」

「扔...扔左佢?」

「立即!!!」

當我拆隻公仔落黎果陣，我嘅眼淚同時滴出黎...點算好...呢隻公仔係佢唯一送俾我嘅野...如果我要讀呢間學校，就要立即扔左佢，我考慮左一陣

「做咩?唔捨得?」

「Miss孔，如果我唔扔，係咪就唔可以係到讀書?」

「係!!!!」

當我聽到之後，我就改為伸手去除我校章

其他師姐見到咁樣，就衝過黎阻止我

「小妹妹妳傻左咩!!!為左隻公仔而想放棄呢到嘅學位!!」

「冷靜d啦!!!」

「師姐....隻公仔...係我一個好朋友送俾我，我可能唔可以再見佢架啦.....如果要我扔左呢隻公仔，我寧願去第二到讀書啦」

「Miss孔....可唔可以俾呢位妹妹...」

「林雪凝!!!妳唔讀呢到，仲有邊到可以去?」

「我去逸怡姐姐到.....我去聖嘉勒」

Miss孔聽到怡姐姐個名之後，就叫班師姐散開

「妳識程逸怡?」

「係....我仲識佢地個契妹...張詩敏」

「呢隻公仔係邊個送俾妳? 程逸怡定張詩敏?」

「係....係程逸風送俾我...」

「程逸風....妳識程逸怡，仲知道邊個張詩敏...好...我唔洗妳扔左隻公仔，不過唔可以扣係書包上邊!!!」

「係.....」

「妳地班大師姐帶呢個妹妹返上課室!!!佢係F.1D班!!」

「知...知道...」

當班師姐送我上去果陣，佢地無不驚嘆

11

「小妹妹，妳好好彩...我第一次見恐怖雞會放過獵物」

「妳今次真係要割雞還神啦」

「知...知道...唔該晒各位師姐」

「妳算犀利啦，咁大膽係Miss孔面前除校章，佢係我地呢到舊生，成績咁多年都係top5，佢極之睇重校風同校服，希望妳唔好成為佢獵物就好啦」

「我...我會小心架啦...」

「妳叫咩名呀?小妹妹」

「我...我叫林雪凝」

「英文名呢?」

「Jessie...」

我返到自己課室，揀左一個窗邊嘅位黎坐，因為小學時嘅佢，好鍾意望住個天，希望我可以同佢一齊望個個藍藍嘅天空

你而家係邊間中學?做緊咩野?有冇識到新女同學?

我摸住果一隻粉紅色羊駝公仔，將佢扣係筆袋上，咁樣佢就可以陪住我上堂

「妳好，呢個位有冇人坐架?」我抬頭一望，有一個同我差唔多高嘅同學企係到，佢扎左馬尾辮，同我一樣有d薯薯地嘅感覺

「呀...冇人架」

佢坐低左之後，我地開始傾計

「係呢，我應該點叫妳呀?」

「我叫林雪凝，妳叫我雪凝或者Jessie就得架啦」

阿May實左太太太娘啦，所以我升中學果時改左Jessie呢個英文名

「我叫周家寶，妳叫我Ivana就可以啦」

於是我就咁識左第一個中學時代嘅朋友

正當我地傾緊計果時，我地課室有幾位大師姐入左黎，佢地全部都係訓導處下嘅風紀，我地將佢地稱為恐怖雞兵團

12

「邊個係林雪凝?」Head prefect帶住幾個prefect leader入到黎我地班

「係...我係」突然間有咁多prefect黎搵我都係第一次

「請問咁多位師姐有咩事?」

果一位head prefect望一望我「就係妳頭先係校門口頂撞Miss孔?」

「係...我唔知道.....學校唔俾掛公仔係書包」

「妳個膽都好大，林雪凝同學，妳仲夠膽係恐怖雞面前除校章」

「係.....」我頭耷耷咁樣面對咁大班師姐

為左一隻公仔，就搞左咁大件事出黎

「不過恐怖雞話批准妳掛公仔，只可以掛係筆袋上邊，以後妳自己唔好行差踏錯，恐怖雞好少可會俾機會人，知嘛」

「知...知道啦姐姐」

當我坐返埋位，先發現自己雙腳好似震緊，而Ivana就好關心我咁樣

「Jessie妳冇事嘛?點解咁多師姐黎搵妳?」

我將頭先件事講一次俾佢聽

「哦，我明啦，妳為左保護呢隻公仔，不惜槓上訓導主任，隻公仔係男仔送呢?」

「下...妳點知架?」

「妳咁珍惜佢，一定係對妳好重要嘅人送架啦，咁除左男仔，仲要係妳鍾意嘅男仔之外，唔會有第二個人」

「唔...都可以係咁講嘅...」

「妳唔去人地學校搵人?俾少少誠意啦，女追男隔重紗」

「其實...我唔知佢去左邊間中學...我可能，以後都唔會再見到佢啦」

「唔好灰心，可能妳係中學生涯會搵到一個比佢更好嘅男仔呢」

「下.....讀女校啫，點會識到男仔呀?」

「總有機會嘅」

就係咁樣，我同Ivana就成為左一對好朋友

林雪凝日記(4)

1-9-199X

估唔到我第一日升中學嘅日子，就做左件轟動全校嘅事。孔美玲老師，Miss孔，綽號恐怖雞，果然名不虛傳。佢嘅殺氣真係可以令一個人企定定係到，我4年級果陣已經槓上佢，點知我今日又槓上多佢一次，今次我好似犯埋死罪咁，係佢面前除校章，就係為左阿風送俾我果隻公仔，有好多師姐話唔值得，但係隻公仔係佢唯一一樣送俾我嘅野，我點都唔可以放棄架。

不過我講出佢地幾兄妹個名時，Miss孔竟然會批准我掛公仔係筆袋上，佢呢個舉動都令在場師姐雙眼就快跌出黎。但係因為呢隻公仔，搞到我第一日返學就好出名啦....唉...我真係想低調返少少

第一日我就識到朋友啦，佢叫周家寶，Ivana。佢呢，就住我屋企附近，所以我地已經約好一齊返放學啦，佢今日扎起一條馬尾辮，佢問我點解咁麻煩要扎麻花辮，其實我扎麻花辮最大原因係因為佢囉，佢同我一樣好鍾意睇天空之城，佢想好似男主角咁飛行尋夢，而我就想好似女主角咁係佢身邊支持佢，Sheeta公主係扎雙麻花辮架嘛，所以我就一直扎住雙麻花辮。

21-9-199X

嘩....band

1學校真係好多功課呀!!!!又多測驗!!!!教左書3星期已經有小測，我真係唔知自己仲可唔可以捱落去啦!!!不過為左雪晴，我做家姐嘅點辛苦都要撐落去架!!!

有時我同Ivana太叻，放學之後係會行下街放鬆下，而我地同班有一個同學就約我地去打下羽毛球出下汗，原來佢都係住我屋企附近，所以我就book左會所個羽毛球場一齊打波。果位同學叫Joanne，佢真係超超超超超靚女，又有身材同長腿，F.1就有咁嘅武器，大個左咪會成個Model咁囉，但係佢又唔鍾意嗰，佢只想靜靜地嫁人生小朋友就算。咁都幾好呀，唔知話要娶我做老婆果個同學而家係邊呢？

13

讀band 1中學果然係非常繁忙，每日有幾樣功課之外，仲要抽時間睇報紙做剪報。差d俾呢d生活壓到透唔到氣，所以我無論幾叻都好，總要抽下時間睇小說。好多朋友都睇瓊遙之類。我反而睇岑凱倫、嚴沁、亦舒佢地嘅小說。一個剛升中學踏入青春期嘅女仔，睇得愛情小說多，自然對愛情有憧憬，睇一睇筆袋上邊嘅草泥馬，又再一次諗起佢

於是我打開電腦，去我地小學同學個group到睇下有冇佢嘅消息

「喂!大家中學點呀?」

「我有男/女朋友啦」

「功課好忙呀」

「好多測驗呀」

呢d對話不停出現，點解冇佢嘅呢?我睇一睇個list，根本佢就冇被Add到入group

「咦?唔見程逸風嘅?」

等左一陣，group主終於reply我啦

「雪凝，我地專登唔俾佢入架，妳知啦，佢以前玩到咁癲又非禮妳，佢又去左間好差嘅中學，點知佢會唔會黎騷擾妳架」

「唔.....但係始終都係同學嘛」

「雪凝，我地一班女仔都知妳鍾意佢，但係妳係優等生，又生得咁靚，好應該去搵第二個襯得起妳嘅男仔啦」

「係囉雪凝，我地介紹男仔俾妳識丫，妳讀女校冇男同學㗎」

「我邊得閒丫，我好多小測呀.....唉.....今日又一個test啦，真係好叻」

點解d同學咁樣睇佢架.....佢地唔記得晒以前阿風點幫過佢地咩?

正想我問班男仔佢去左邊時，我隻手突然停低

俾妳問到又點?妳自己去追佢咩?ba

b一定唔會俾我咁細個就拍拖，倒不如，中學時代等下佢，睇下我地有冇緣仲好啦

10月嘅測驗，係我升中後第一個測驗，我唔可以就咁失手嘅

食lunch之後嘅課室，我同Ivana不停係到研究功課

「嘩...Jessie妳真係一個超級認真魔人，妳連少少時間都唔過呀？」

「我唔想失手呢，一陣俾學校趕走嘅話，我妹妹咪冇得係到讀囉」

「妳妹妹幾大呀？」

「佢三年級」

「得閒我去陪下佢玩先」

「妳冇妹妹架咩？」

「我得一個阿哥咋」

因為我同Ivana經常都係到溫書關係，所以我地就俾人冠上書蟲嘅稱號

其實我地兩個唔係書蟲啦，有時我地都會去銅鑼灣行街嘅，雖然我地有時都係行書鋪之類

就係F.2果年，我開始學打扮自己，我同Ivana兩星期左右就會行一次街

林雪凝日記(5)

20-6-199X

話咁快，F.1一年就完左啦，今年我一如以往都係考第一，ba b都應承帶我地去北海道玩，ba b好鍾意去日本架，所以我地一家人成日都去。

今年讀書比小學更辛苦之餘，我仲要提防Miss孔嘅突擊，有次俾佢突擊檢查校服，真係嚇死我啦。

無啦啦俾d同學叫做書蟲，喂呀...我只係想讀好d書者.....花多d時間讀書唔係叫書蟲呀.....

今年最大進步嘅成績係家政科，呵呵呵呵，我每晚都會走入廚房跟媽咪學煮飯架，今年仲學識埋織頸巾

唔.....我諗我真係大個女啦.....mm開始再黎，雖然唔係個個月都黎，但都代表開始大個女啦，諗返起6年級第一次m到果幕「紅潮風暴」，真係癢到爆呀!!!成條裙都係紅色，如果唔係佢除件校服俾我擋住，我真係唔知點返屋企啦!!!但係果日好似佢就冷親，姐姐黎接佢走果陣又鬧左佢幾句。佢兩姊妹好為人著想呢...果日怡姐姐仲專登幫我俾埋m巾我先帶佢走。

今年我係第一次升中之後拎模範生啦，ba b專登休診半日，夜晚黎睇我上台拎獎狀。但係我又俾雪晴串啦，佢串我話我成間房都係獎狀，可以拎少d嘛

妳估妳家姐我想架咩

「Jessie妳睇下，呢條裙同衫幾襯妳喎」

「下?短裙喎...唔好啦」

「妳而家開始有胸啦，唔怕啦，著下背心出街都唔驚嘅」

「但係...」

「唔洗但係啦，試下啦」

於是我就聽佢意見買左少少衫，仲有買左白色以外嘅胸圍內褲

「雪凝呀?妳識自己買胸圍啦?」媽咪拎住我新買嘅胸圍入黎問我

「呀.....我係咪買唔啱size呀?」

「唔係，不過媽咪見妳上圍呢兩年開始長大，叫妳唔好買咁貴果d」

「媽咪...我應該唔會再大啦?」

「好難講架」

「我唔鍾意太大呢...」

星期一係屋企著起套校服，真係發現自己開始發育啦，已經係少女身材

有時放學同Ivana經過一d舊CD鋪，我地都會入去睇下野

Ivana佢好鍾意陳奕迅，真係超級Fans黎

不過我鍾意果個就係.....

「下? Jessie妳睇黎明呀?」

「咁.....我鍾意黎明㗎嘛.....佢好差咩?」

「唔係，我估唔到妳會鍾意聽黎明者」

「好奇咩...」

「我係咪好任性呀?」

「係!不過係我揀嘅」

「妳真係超級Fans呀!!!!」

CD鋪中播出左我最鍾意嘅夏日傾情

“I Love u...妳會否聽見嗎?...”

我心中嘅你，而家係邊?我記得佢係住呢到附近，點解我仲未撞到你嘅?

F.2果一年嘅talent show，我俾Ivana同一班同學呢左上台唱歌

「呀...點解要搵我上台唱歌呀?」係鼓成泡腮好不滿咁講

「Jessie妳次次測驗第一，操行又A，我地想睇下妳係咪連唱歌都一樣咁好聽囉」

「我覺得妳地係似屈我上台多D囉」

「去啦!!!洗唔洗幫妳揀歌?」

「唔.....」

「妳鍾意邊個歌星?除左黎明」

「唔...梁詠琪...楊千嬅...」

「咁妳鍾意唱咩歌?」

「王菲首約定，或者趙學而首最佳位置囉」

「不如我幫妳揀丫，我地得F.2，揀返D青春少女歌比較好」

「有咩青春少女呀?」

「妳講緊妳自己呀?青春期懷春少女」

「咁妳想唱咩?」

「約定啦，王菲果首」

結果我嘅歌聲都嚇親一班同學，由果日開始，佢地就不停問我有冇男朋友有冇人追緊之類

林雪凝日記(6)

10-10-199X

尋日測驗完左啦，我今日就同Ivana仲有Joanne去行街，大個女啦，要開始自己買衫，唔好成日痴實媽咪。我買左幾件衫同裙，一對Cons布鞋同一對涼鞋，之後我地竟然去揀胸圍!!!我係左揀右揀之下，揀左幾個粉系列嘅，當然內褲又唔會透透地果d啦，點著返學呀!!一陣俾恐怖雞捉到就死架啦

22-12-199X

今日係Talent show

日子啦，無啦啦俾班同學呃左我上台做代表，要我唱歌。我邇左好耐，都係唱王菲首約定啦，其實歌詞幾啱我同佢嘅

兩鬚班白，都可認得你.....

當我順利F.7畢業之時，就係我同佢十年之約啦.....佢會唔會仲記得我，仲會唔會娶我架?

15

估唔到俾Ivana講中左，係我F.3果年，真係有其他學校嘅男仔黎追我。當然因為學校搞Join school function，而我係helper之一，所以就開始同其他男仔有幾句說話傾

「嘍?Jessie呀?妳住堅尼地城?」

「我?係呀，Johnny你呢?」

「我住薄扶林，我一陣送妳返屋企丫」

「下.....其實.....」

「唔洗客氣啲」

永遠永遠都係Ivana出黎救我

「喂!!!我住Jessie附近啲!!!送埋我丫!!!」

Ivana永遠都會係最啱嘅時間出現，我地兩個落左車之後慢慢係海邊行

「喂，Jessie，果個king屎仔想追妳啲」

「邊...邊係呀?」

「睇唔上佢?」

「我唔想拍拖住呢」

「唔想丫...定係仲鍾意緊佢呀?」

「邊...邊個佢呀?」我面紅紅咁反問佢

「呢.....初吻男主角呀」

「邊係啲.....都唔知而家佢點」

返到屋企瞓係床上自己諗，有時都真係好想有個男朋友係自己身邊陪我，班上有同學開始拍拖啦，有時係山下見佢地著校服拖手，真係好青春

打開電腦睇下小學同學group有咩新update先，係啲，下星期有聚會啲，唔知佢...會唔會黎呢?

「Jessie!!!擘!!!唔見一年，又靚女左啦」

「邊...邊有呢」

「坐低啦!差唔多齊人架啦」

「呀!!唔該晒Miss Lau，妳咁照顧我妹妹」

「雪晴佢真係好叻，似足妳，次次都考第一，爸爸診所忙唔忙呀?」

「冇話忙唔忙...開業3年，總有回頭客嘅，新客都唔少，始終西區有d醫生都要退落黎，爸爸就幫老前輩照顧舊病人囉」

「妳有冇去幫手呢?」

「助護放假果陣我要去幫手架」

「妳仍然係咁幫得人手，咁乖女」

「咁...以前有個同學教我，幫到人就要幫嘛...」我耷低頭靜靜講

「妳指...阿風?」

「嗯...」我點一點頭

「Miss Lau妳知唔知佢去左邊?我...有d掛住佢」

「妳想見佢，妳唔問妳地訓導主任?佢識阿風屋企人」

「唔...唔啦...F.1第一日我已經槓上左佢，呢幾年好彩乖乖地，先至冇野俾恐怖雞捉到」

「我最後一次見阿風呢...係F.2果年，我有D驚訝佢可以升到班」

「Miss Lau妳係邊到見到佢呀?」

「唉.....北角警署」

「警署?」

「係...佢入左間Band 3學校，日日同人打晒架咁，佢一個月唔係入醫院驗傷就係入警署，果一次佢搵唔到屋企人保釋佢，所以打返黎學校搵人保釋佢走」

「咁妳仲有冇見過佢?」

Miss Lau擰擰頭

「我只係知道佢差d俾人落charge，不過好似改為警司警誡，有警察長期看住佢，而家好似轉左校」

「咁呀...」

「雪凝妳仲好鍾意佢呢?」

「下....邊係呢...」

「妳唔洗呃我啦，我做過妳兩年班主任，妳4年級果時又係我教英文，果時妳已經鍾意左阿風呢?」

「其實...係3年級」我耷低頭面紅紅

「小學Last day果日呢...我都見到佢對妳做左d咩」

「其.....其實我地...」

「青春期少男少女，好正常者，妳而家都應該有男朋友啦?」

「我...冇呀...不過有個男仔追緊我」

「如果唔妨礙學業，可以試下嘅」

「唔啦Miss Lau.....我都唔鍾意人」

「定係...妳仲鍾意緊阿風?」

我點一點頭「嗯」

「妳都真係幾傻女㗎」

我邊R頭邊講「我個好朋友都係咁講我呢」

阿風佢已經轉左校?去左邊呢?就連佢小學嘅朋友都搵佢唔到，莫非佢已經搬離香港島?

每一次聯校活動開會，king屎仔Johnny都會坐係我隔離，不停瞭我傾計

「Jessie妳認為呢個計畫點呀？」

「嗯...呢個Plan都唔錯，其他同學認為呢？」

每一次開會我都覺得好悶，經常都係各間學校學生自己係到show off自己，有時候我都想讀返d普通中學，唔需要同d名校生一齊相處

因為今次係Join school 比賽 關係，每間學校都派出精英份子出席，務求要為自己學校爭光

其實有咩好爭呢？又唔係真係學界嘅比賽，只不過係友誼交流者

「Jessie妳唔係以為真係普通交流呀？」

「唔係架咩？咁係咩呀？」

「呢到有幾間敵對學校係到，DBS同LS，我地同協恩，每間學校都想打低對方」

「我真係唔太明，點解要搞咁嘅野出黎」

「型囉！」

「一D都唔型囉」

「我地學校今年唔派俾精英出戰，可能會輸啲，我地個金漆招牌冇啦」

「我地今年出左個秘密武器丫嘛」

「Joanne？」

「係呀!!佢有大胸長腿又靚女，打羽毛球友誼賽者，佢應付到嘅」

「一陣佢著條體育褲出黎實引死男仔，再加埋佢對c奶，直係一流呀!!」

「Ivana妳真係好變態呀!!!」

「Jessie，妳都坐B望C架啦，得閒都show多d本錢出黎」

「唔制!唔鍾意俾人睇蝕晒」

「錯啦!妳只係想俾草泥馬睇者」

「喂呀!!!咪再提啦!!!」

我地兩個係到嘻嘻哈哈咁笑

18

聯校羽毛球友誼賽開始啦，果然Joanne一出場就引黎其他學校男仔嘅支持，佢每一下殺波、救波都轟動全場

其實Joanne係入學果時已經俾一眾大師姐Mark定入邊個校隊，因為佢體育同讀書都好犀利，不過佢全部拒絕晒，當我地問佢點解唔入校隊果時佢就話

「練習真係好辛苦，冇晒私人時間」

佢咁講又真係冇錯，所以有時我同Ivana都會約下Joanne打下羽毛球放鬆下就算

Joanne真係我地校花黎，佢F.1開始已經有其他學校男仔係山下等佢放學，不過佢地下場都係俾恐怖雞用獅哮功震左落山

有一次，一個男同學最慘，佢只係黎接唔舒服嘅妹妹返屋企，但都俾恐怖雞盤問左好耐，要搞到人地學校老師同家長打電話黎解釋先解決到件事，不過最後恐怖雞都嘉許左果位同學。

全靠Joanne，令我地學校個金漆招牌仍然係到

「嘩，犀利啦Joanne，一出場就引死全場男仔」

「拿!!我黎打波架咋!!我唔係賣肉架」

「但係呢...妳有冇睇中呢到d男仔呀?」

「冇喎!」

我好驚訝咁講「冇?!」

「Jessie妳自己睇中呢到d男仔咩?」

「咁我又睇唔中嘅.....」我邊R頭邊講

「但係呢到個個都差唔多未來精英，點解妳都睇唔上眼?」

Joanne諗一諗然後答我地

「其實我覺得第一個感覺係好重要，但又唔可以話一見鍾情果種」

Ivana加把口落去「即係頭幾次見面就感覺到，呢個男仔可以發展喎，咁樣?」

「Exactly!!!」

「第一個感覺呀....唔.....」

「咦?Jessie...莫非妳...有意中人?」 Joanne眼光非常之奸

「邊...邊到有呀!!!我呢d村姑.....」 我又再耷低頭怕怕羞羞

「哦!佢呀?佢心中有一個小學同學，佢鍾意人好耐啦，又唔敢去搵人地」

「嘩!Jessie估唔到妳咁長情喎!小學初戀」

「邊...邊係呢...我...係我自己暗戀佢者.....」

呢個時間，我地都準備走，點知Joanne一拎起行裝，就有個高大嘅LS仔走過黎同話同佢一齊行。識趣嘅Ivana就撓實Joanne

「Joanne同我地住得好近，唔洗麻煩你啦」

同一時間，Ivana都撓埋我

「呀~Johnny呀，Jessie都同我地一齊走架啦，你都唔洗送啦。唔...仲有呢，你都係少d黎等我地放學啦，我地學校危險呀」

其實點都要俾個交代對方嘅，於是我去到Johnny面前

「唔好意思呀...其實我都知你嘅意思...但係...唔...我屋企比較嚴同埋...呀...」

「啊...唔緊要，我...明嘅」

「你明就拜拜啦，拜拜!」 Ivana極速帶走我地兩個

我地離開體育館，好快去銅鑼灣行街

「Jessie妳第一次拒絕人嘅感覺係點呀?」

「感覺呀.....我怕會唔會hurt到佢呀」

「Hurt乜鬼丫!!!d男仔好快就追過第二個女仔架啦，放心啦，妳估佢會去跳樓咩」

「Jessie妳講下，妳心中理想對象係點丫?」

「下...理想對象呀.....」不然間就諗起佢，好幫人、但係又成日蝦我咁樣

「嗯...其實佢對我好、錫我就夠...唔洗一定要高大靚仔有錢，成績差唔緊要，不過佢一定唔可以做犯法嘅事」

「咁樣好易搵者，頭先求其執一個都可以已經係啦」

「咁又唔可以咁講嘅」

我地呢個話題傾左好耐

漸漸地，我地三個變左好姊妹，雖然Joanne揀左文科班，但我地經常都會一齊行街

到我F.4嘅時候，我心中嘅佢，開始隱約間出現係我面前，全因一個新黎嘅F.1新生，

「我叫張詩敏，今年5歲...」

林雪凝日記(7)

10-10-199X

我第一次代表學校去同其他學校開會，係關於下個月嘅聯校羽毛球友誼賽。為左冇咁悶，我拉埋Ivana去陪我，點解唔搵Joanne去?我地怕佢俾男仔圍住晒，所以放棄叫佢去。

不過估唔到俾男仔圍果個係我，好慘呀!!!有個King' s仔不停係到瞭我傾計

佢煩唔煩?少少咁啦，不過我又唔想開口咁絕，於是Ivana就大派用場啦

今日個King' s仔話想送我返屋企，當我仲諗緊點樣拒絕佢果陣，Ivana已經撲左出黎救我一命，我真係唔知點多謝佢先好啦!!!

26-10-199X

今日係小學同學聚會，一如以往，我都係見唔到佢，不過呢，Miss Lau同我傾計果時，我終於知道少少關於佢嘅消息。原來佢之前經常俾警察拉返警署，仲搞到要搵小學老師去保釋佢，仲差d俾人送上法庭，但係好彩人地肯放過佢，而且佢已經轉校去左第二間學校讀書。我真係好希望見一見佢，陪佢一齊溫習。我有d同學開始拍拖啦，佢地有時同男朋友一齊去溫書，果個場面真係好sweet架，搞到我都想有個男朋友。

如果可以同佢一齊溫書嘅話，有幾好呢?佢唔識，我就可以教佢，通常都係我教佢架啦，小學果陣有邊次考試前唔係我陪佢一齊溫書丫。

我都想好似其他同學咁，坐係球場邊睇住自己男朋友打波架

希望下次眾會見到佢啦

F.4開學第一日，雪晴陪我一齊出門口

「妳呀!今年六年級啦，呈分試要俾心機呀，唔好旨意晒我呀」

「得啦家姐，我每科都高分過妳以前呀，如果我咁都入唔到妳果間學校，我跳海算啦」

「放學唔好去診所搗亂呀!!!」

「知啦!!!!」

不經不覺雪晴都6年級啦，我有話佢知道我學校已經Mark左佢出年黎讀

我都準備會考課程啦，睇黎功課同壓力都一定大過以前好多好多

「喂!早晨呀靚女!」「妳都早晨呀!!」

「yo!!三個人齊人!!行得!!」

我地三個總係約埋一齊返學，冇辦法啦，我地三個真係住得好近，基本上五分鐘路程就到對方屋企，真係名乎其實借洗手間都易d

「呀...會考啦...點算呀」

「Jessie妳洗乜係到嗰救命呀?妳連續三年全級第一，點會返唔到原校」

「Joanne妳夠穩佔文科科目Top5啦」

「係啦!!我讀書最差啦」

「妳差?妳數學都不知幾好呀!!!」

我地三個嘻嘻哈哈咁行去學校，差唔多到校門果陣，我地見到個小師妹，頭髮又亂又唔梳頭，仲好似馴緊咁樣行返校門

「喂喂，妳地睇下前面個新生F.1妹」

「嘩!!又唔梳頭又好似未馴醒咁，一陣實俾恐怖雞省到立立令」

「第一日開學，就俾恐怖雞用獅哮功鬧，會死人架」

「上去幫下佢啦」

我地三個追住個F.1妹，佢有少少面熟，不過佢真係未馴醒咁樣

「同學，妳係咪F.1新生呀？」

「嗯...係呀」

真係冇估錯，佢係一個F.1妹妹，如果唔救佢，肯定會俾恐怖雞折磨到死為止

Joanne望一望校門「喂喂，Miss孔就出黎啦，快d救佢先啦」

「妳咪樣會俾Miss孔，我地個訓導主任捉唔整潔架」

點知佢嘅回覆令我地三個好驚訝

「恐怖雞之嘛，我怕佢有牙咩」呢位妹妹嘅態度好輕佻下，我已經想像到一陣佢中地雷果一刻會點

佢唔理我地繼續未馴醒咁走去校門

「喂...我地三個跟住佢好d啲」

「行啦!!仲講」

終於去到校門果時

「妳!!!做咩唔扎好辮!!!」 「妳!!對襪做咩咁短!!!」 「妳!!!點解個頭係深啡色!!!」

恐怖雞用佢嘅獅哮功不斷咆哮，終於嚇到個妹妹醒左，佢好慌忙咁拎塊鏡出黎扎辮，超級狼狽

「Jessie妳去幫幫佢啦」

我走埋佢身邊「我幫妳啦妹妹」

「唔...唔該晒姐姐」

21

Joanne首先幫佢梳好頭，至少唔好未瞓醒咁

然後我就用極速幫佢扎好一對麻花辮，我望真d佢，佢又望實我。佢好熟口面，一時諗唔起佢係邊個

我地四個一齊行入校門

「四個企係到!!!突擊檢查!!!」其實我都預左，每一年Miss孔都會係我第一日返學同我檢查校服，有人話佢對我期望好大，不過我只係覺得佢想捉我一次者

Miss孔對住我地四個好細心咁檢查，佢用係小妹妹身上時間最耐，就咁睇我地都見到有少少問題，竟然...Miss孔放過佢

我地四個安全冇事咁通過門口之後

「喂! Jessie!!去買野食囉」

「知啦!!」

我轉身同小妹妹講「以後妳自己準備好啦，下次我地未必救到妳架啦」

「知道啦姐姐.....」

「Jessie!!!行啦!!」

當我轉身想行果陣，小妹妹叫住我

「呀!!!姐姐，我仲未知妳叫咩名」

我轉身對住佢笑「我叫Jessie Lam，林雪凝，F.4D」

然後佢再問左我一句

「姐姐妳係咪西區官立小學升上黎架?」

「係呀!!!我地係學校見啦!!拜拜」如果唔跑快D，燒賣會俾前面果兩個大食怪食晒架

我地三個係小食部食早餐

「Jessie，頭先個妹妹識妳?」

「唔知呀，不過佢知我邊間小學」

「我估唔到恐怖雞會放過小妹妹喎，通常犯果幾個錯果時，恐怖雞會...」

「妳!!!點點點點!!!妳!!!點點點點點!!!」 Joanne有時扮Miss孔係幾似下

「不過妳地有冇睇清楚...個小妹妹個樣好似Miss孔呀?」

「唔會係佢個女掛」

「但係傳聞Miss孔係有個獨生女架啫，如果佢黎讀嘅話」

「雙雞拍門囉!!吼!!!!!!咁樣」

Ivana嘅想像力真係一流呀!!

Joanne返入A班文科班，佢背野真係好勁，中史、history、Econ、Geog加埋Eng、Lit，完全係一個文科人配搭

我同Ivana就傳統理科 Phy, Chem, Bio, A.maths再加多科電腦，呢個都係一個讀死人嘅死亡組合

第一日F.4開學就好似開傳銷大會咁，不斷提醒我地就快會考咁

終於到恐怖雞時間

「各位同學，有冇信心挑戰我地學校歷來最多A嘅校友呀？」

「Miss孔...學校只俾我地報8科.....我地想挑戰DGS同協恩都唔得...」

現場傳來一片埋怨聲

「嘩...成班食錯藥呀？」「唔知呢」

「我地學校想低調少少，唔想太出位」

「Miss孔，咁我地學校最多咪得8A，點會仲可以多D？」

「我指妳地A-Level時挑戰，係，妳地而家只可以報8科，但係...廿幾年前，我地學校係有一個9A狀元黎左入讀，佢係我同班同學，仲係一個外校生」

聽到恐怖雞咁講，大家都非常驚訝，我地個大師姐，恐怖雞都會輸俾一個外校生，係台下有同學靜靜咁講

「咁佢咪係超級恐怖雞囉...」台下有同學不停偷笑

「咳咳!!!」恐怖雞即將發言

「冇錯，我地學校最高紀錄係9A升預科，係外校生，最重要嘅係...」

大家靜靜咁期待恐怖雞講野

「佢係一個男仔，係我地學校嘅女校男生」

恐怖雞咁講，全場只有一個字講出黎

「下」之後就靜晒

「希望大家可以打破佢A Level全A紀錄入U啦」

「Miss孔」

「咩事」

「果位同學...叫咩名...佢而家做緊咩？」

Miss孔面有難色，好似唔太開心咁

「佢姓程，Tony程，程偉忠，不過佢係7年前已經過左身」

Tony? 我突然回想起當日係小學教員室聽到嘅說話

“ Tony果時都好堅強咁作戰，雖然佢輸左，但佢係作戰到最後一刻”

我地返到課室，收埋通告，就落左去Starbucks坐低飲野

「丫...妳估恐怖雞果陣係咪暗戀果位9A狀元?」

「不過竟然係外校生，仲要係女校男生」

「所以佢咁先吸引到恐怖雞囉，妳地估佢係唔係恐怖雞個老公?」

「點會呀!!!公雞經常黎接恐怖雞放學架，咁多年都冇死冇換過人，係換車者」

「9A狀元咁就冇左，好可惜」

「妳地估下我地果年會唔會有女校男生丫」

「有嘅話我實玩殘佢!!!」

「例如?」

「除佢條褲將佢下邊拉長打結!!」

「嘩...如果佢好短呢」

「彈JJ遊戲!!!!」

林雪凝日記(8)

1-9-199X

今日F.4開學啦!!代表我進入左會考課程，第一日返學班主任就話，妳地會考架啦，要努力多D啦，少D去玩之類，其實俾我地放鬆少少都得掛?

今日開學，又有一堆F.1妹妹黎啦，點知我地未入校門就遇到一個好大膽嘅小妹妹。佢真係犀利囉，頭又唔梳好、辮又唔扎、又未瞓醒咁行返學校。我地三個見到當然係立即上前想話幫佢啦，點知佢已經知道邊個係恐怖雞，仲唔將佢放係眼內咁，我地三個聽到即時嚇左一跳，竟然有人唔怕恐怖雞?

但係佢一行近校門，見到恐怖雞係到啄人果時，就嚇到呆左，立即拎塊鏡出黎整理，如果我地三個陪佢入校門，而佢俾恐怖雞捉到嘅話，我地三個都會受罰架，所以我地三個立即合作幫佢扎辮梳頭整理校服，點知我地都係俾恐怖雞檢查一次校服，年年開學我都會俾佢檢查一次，真慘

我地眼見小妹妹套校服都有唔少問題，例如校章扣唔好、拉鍊未拉晒、校服熨得唔夠靚，正當我地準備一齊受罰之際，恐怖雞竟然放過小妹妹，我諗佢係繼我之後第一個俾恐怖雞放過嘅人。

正當我地三個去買燒賣之際，小妹妹叫住我，問我叫咩名，佢知道我個名之後，再問我係咪西區官小升上黎，佢竟然會知道我邊間小學，可能佢係小學師妹啦。呢個小妹妹，有D似...其實係生得好似Miss孔，唔通佢係Miss孔個女?

我地會考生，返完班房之後就去左禮堂聽老師校長訓話，冇法啦，會考班嘛。

點知恐怖雞今日同我地講，我地學校歷來成績最好升U果個同學係一個外校生，仲要係男仔，一個以9A成績入讀嘅男仔，仲要係Miss孔嘅同班同學，正當我以為係佢老公之際，原來果位女校男生係6-7年前已經過身啦。佢真係好慘呢...好同情佢屋企人。

點都好啦!!!會考啦!!!要努力啦!!!!

唔知同我同屆會考嘅你，而家點呢?

正式上堂嘅日子黎啦，Ivana依舊坐我隔離，而我筆袋上，果一隻粉紅色羊駝公仔仍然係到
好啦!!!我嘅護身符，我地一齊努力啦

「妳仍然係對住隻公仔傻笑㗎」

「咩㗎，咁...佢係我護身符嘛」

會考課程真係好趕好趕，第一日上堂已經派功課。我d text book由第一日起已經俾我畫到花晒，jot notes，註解之類，真係抄到手都斷，真係有抽筋嘅感覺

每一日返學都幾難捱，有時望住隻羊駝，自不然又再諗起佢。如果佢一樣係F.4嘅話，我地會同一屆會考，唔知幾左幾年後嘅你，會係點呢？你仲記唔記得我呢？

放學時間，我同Ivana同埋Joanne一齊去到海邊休息下

「呀!!!好叻呀!!!!」Ivana對住大海係到大叫

「妳一d都唔似叻㗎」的確，Ivana有無盡嘅體力

「叻果陣咪黎海邊休息下囉」

「之後係咪直接跳落海呀？」

係海邊果到有個籃球場，果到甚少人黎打波，一黎果邊冇士多，二黎又係工廠入邊
但係今日，有幾個男仔著住校服放學後黎打籃球

「呀...妳地話丫，如果我地可以好似班男仔咁樣，一放學就衝去打波妳地話幾好呢」

「唔洗溫書嘅？」

「呢幾個男仔，係樂善堂書院d學生㗎，幾高大下」

「Joanne妳想去識人呀？」

「唔啱心水，Jessie妳呢？」

「下.....我呀...」望一望幾個男仔

「唔係我心中嘅類型呢」

「都知妳仲係鍾意佢架啦，不過呢幾個男仔好高大㗎」

「打籃球點會唔高大呀」

「好悶，睇下有冇辦法整估下佢地先」

「Ivana妳唔好乘機㗎」

「唔會啦！」

Ivana帶住我地走去籃球場旁邊d椅到坐，睇幾個男仔打波

「丫，呢幾個男仔打波都幾叻喎」Joanne用行家嘅眼光望實人地，十足十球評家咁

「可能係校隊呢」

的確果幾個男仔打波好有默契，走位配合得好好

「佢地隊女子籃球隊都好似水平好高下」

「同我地有得比咁啦」

男仔一打波就非常之忘型，有其他學校嘅女仔係到睇打波都唔知，打波期間亦都有唔少粗口飛出黎，搞到我唔係太慣。因為屋企真係冇人講粗口。而且爭波時，佢地d男仔都毫不留手，直到個波就快飛到我塊面，我大叫果時，先知道差d闖禍

「彭!」一聲，女神Joanne伸出一隻手出黎保護住我，同時Ivana已經捉實個波。佢地幾個企定定係到，傾緊派邊個黎拎返個波之際，Ivana已經拍住個波慢慢行出去，仲拉高埋條裙，成隻大脾俾人睇晒啦!!我同Joanne跟係佢後邊

「呀...女俠...唔該可唔可以俾返個波我地?」

呢個男仔大約170cm高，不過呢，佢一開口果陣，佢塊面同時好紅，極為怕羞。Ivana見到咁樣就忍唔住笑

「你唔洗咁怕羞呀?我係黎俾返個波你地架喎」

「下...唔該晒」正當呢位同學想伸手拎個波時，Ivana順手表演下佢跟佢哥哥學嘅幾手招數出黎，怕羞仔點都拎唔到個波

Ivana用一隻手指轉波之時，其他人都好驚訝

「呢位同學，咁樣你拎唔到我個波點算呀?」

「波?」

其他男仔下意識望我地心口，Ivana同時知道佢地望咩

「點呀?有咩好望?未見過女校嘅女仔咩」

「好似妳咁著長衫打籃球嘅女仔，我真係第一次見」

「阿哥仔，你挑我機?」

「大家交流下者」

Ivana似乎想鬆下筋骨「點呀?邊個想同我射下Key」

「贏左咁點先?」

「贏左呀?」佢望住我同Joanne

「你贏左嘅話，我俾我兩個同學電話你」

「成交!!」

「如果你輸左呢?」

「唔...我請你地三個飲野」

「成交!」

「我地男仔好禮讓，俾妳揀對手啦」

「你地邊個射3分最勁?我要挑戰下佢地」

「3分呀...我地兩個3分射手今日都有黎喎」

「咁怕羞仔你做我對手啦」

「下...哦...」

Ivana明顯就係蝦人地，果個男仔打波時好少起手射波嘅，而且Ivana又迫人地俾佢射先，所以我地都知結果係點

“in...in...in...in...in...” Ivana果然係球球都入晒，佢真係得到佢哥哥嘅真傳，唔洗10分鐘，班男仔已經輸左100蚊俾我地

「女俠...小弟佩服佩服...」班男仔終於認輸啦

「算啦，見你地肯認輸，拿!我叫周家寶Ivana，長腿大胸呢位叫關樂誼Joanne，至於扎孖辮呢位呢，叫林雪凝Jessie，名就講晒你地知啦，有冇辦法識到我地就睇你地自己啦」

俾Ivana咁介紹，我都有d唔好意思

「咁我地想知...妳地邊間學校」

「模範生，妳答人地啦」

「我地...係英華女校架」

當佢地一聽到我地學校名時，面色都變一變

「恐...恐怖雞d學生呀!!兄弟們，退後!!!」聞雞色變

佢地好好笑咁退後左幾步，估唔到Miss孔係咁出名

「你地好驚恐怖雞咩?」

「佢好出名，一陣俾佢見到我地黎瞭妳地，我地就死架啦」

「唔係喎，應該唔死得晒，Anthony咪唔會怕恐怖雞囉」

「你拎佢張相出黎做擋箭牌囉，你臨時臨急點去HKU搵佢呀!」

「喂!」

「係!女俠!!」

「我地返屋企啦!有緣再見啦!!拜拜」

就係咁，我地就贏左100蚊走

「估唔到恐怖雞咁出名，連其他學校學生都驚左佢」

「佢嘅獅哮功聞名方圓兩個地鐵站嘅學校，不論中小學都要俾面佢」

「咁做佢個女應該好慘」

「我聽到小道消息，話恐怖雞好錫個女架喎」

「恐怖雞好似得一個獨生女嘛，唔錫佢錫邊個」

「聽講係恐怖雞之前小產左三次先陀到呢個女，所以當佢掌上明珠、心肝寶貝咁睇」

「其實Miss孔都幾偉大概，佢應該係好媽媽」

「我係舊校刊見過恐怖雞後生張相，真係好靚女，校花一般」

「咁佢個女應該都唔差得去邊」

「妳地估下佢個女會唔會係我地學校讀㗎」

「唔出奇架」

「咁可能好快就有雙雞拍門睇!」

「係雙雞啄門呀!!咯咯咯!!」

林雪凝日記(9)

13-10-1999

會考課程真係好迫好趕，每日都有唔同功課、past paper之類，唔怪得有學生讀到抑鬱症。今日放學後，我到三個去到附近工廠區個球場吹下海風，食果到夠靜夠舒服。但係今日竟然有班男仔黎打波，個個就咁除左件恤衫，著波鞋打波。Ivana見到呢個情況，就自不然想去瞭人地玩下，因為佢同Joanne一樣，坐唔定，鍾意打波運動果類人，如果叫佢地陪我去行書店，佢地寧願死。我地三個行入球場，坐低靜靜地咁睇佢地打波。原來呢班男仔打波都幾好嘞，有好多激烈鏡頭，而且仲夾雜唔少粗口係入邊，搞到我都有d唔好意思。

突然佢地個波飛過我地到，我呢d運動細胞同0冇分別嘅女仔係呢個情況下只可以大叫，不過我身邊果兩位女俠就好快手咁保護我，Joanne攬實我，而Ivana就將呢個咁快嘅波接實，然後佢就帶住我地去挑戰班男仔。

佢地都幾有風度架，俾Ivana自己揀對手，所以Ivana就揀左個好怕羞嘅男仔同佢比一比，賭注係我同Joanne嘅電話號碼，不過Ivana都係食過夜粥嘅女漢子，佢好快就將怕羞仔打敗，幫我地贏左100蚊返黎。

當班男仔知道我地係英華女校學生嘅果時，佢地立即講我地係恐怖雞嘅學生再退後幾步，佢地真係聞雞色變啦，好可愛，但係聽佢地語談中，佢地之間有個叫Anthony嘅男仔係唔會怕Miss孔，可能係Miss孔嘅親戚啦，就係咁樣，Ivana同佢地交換左電話，無啦啦我地識左呢班讀樂善堂書院嘅男仔啦。

佢地比起傳統名校嘅男仔笑得更開心，同佢地相處左一陣就覺得好舒服，成班冇咩架子，可能呢d就係男女校同男校之間嘅分別啦。

係我F.4果一年，出現左個好強勢嘅F.1女同學。係女校之中，總係有八掛是非，又有人爭做大家姐咁，呢位小師妹真係咩人都唔驚，佢視大師姐為無物，佢連風紀組都唔驚，上堂馴覺、但出奇地佢成績超好，有時學校見到學生成績好，就會當冇事發生，咁嘅情況真係唔好，所以有風紀帶左果位小妹妹去見Miss孔，正當大家以為佢會俾獅哮功震到飛落山之時，佢竟然可以係訓導處、恐怖雞嘅領土中無穿無爛咁行出黎，呢個真係我地學校近年來嘅奇蹟之一

果位妹妹，就係開學時我幫佢扎辮果位，而我只都知佢叫咩英文名，佢係F.1A班Jasmine

老老實實，佢真係生得好靚女，笑容好甜好有氣質，佢合理眼微笑果時係好吸引人，如果佢係男女校讀書嘅話，一定好多人追，好唔明點解佢會揀左我地間女校黎讀，唔通佢又係貪呢到入U率好同出名？點都唔會有人因為想做尼姑修女而黎讀書掛。

今日放學後係球場，我終於見到佢挑戰一班師姐啦，係籃球場上，Jasmine槓上左B grade籃球校隊

因為基本上冇任何同學會著長衫校服打波，就連校隊都會著返體育衫練波，因為件長衫太太太麻煩啦!!果日Jasmine正正自己係到著長衫打波

一班校隊師姐見到之後，就去“訓示”佢，因為如果俾恐怖雞見到，自己身為大師姐，身邊有小師妹做錯而唔去糾正佢嘅話，係會俾佢用連坐法罰架，所以點解我永遠唔會係操場出現就係咁解

「嘩...咩事呀?果個F.1妹妹挑戰F.3同F.4嘅 B grade 籃球隊?」Ivana拎住一袋薯片邊食邊睇，我亦都順手去拎幾塊黎食

「我輸賭20蚊，個小妹妹贏校隊」

Ivana聽到我咁講「殺妳」

Jasmine今次槓上嘅係b grade籃球隊嘅TB隊長。TB隊長佢有好多fans架，非常受歡迎。

今次Jasmine挑戰嘅又係射key，而且TB隊長仲好輕敵咁讓佢。當我聽到話用單手讓Jasmine果時，就知道，佢太輕敵啦。Jasmine妹妹佢簡單熱左身之後就開始射波，佢入到第三球時，籃球隊同學都開始擔心，因為Jasmine佢真係百發百中，比Ivana更犀利。射到最後嘅3分波，Jasmine都冇失手。同時佢令好多同學另眼相看，體育老師即場邀請Jasmine加入籃球隊，不過佢拒絕左

佢仲邊用一隻手指轉波邊對住對方微笑，講左句“承讓承讓”之後，再拋返個波俾人。佢咁樣做法，可能會令自己係學校中樹敵，希望佢會明白啦

「喂，20蚊呀」我伸出隻手向Ivana收錢

「估唔到校隊都會輸啎」

「佢地自己輕敵者」

「可能呢個妹妹遲d會引起好多風風雨雨啦」

「妳點解咁講呀？」

「頭先恐怖雞已經係樓上望實成個過程，塊面仲要係好黑」

過左大約一個月左右，我地見到Jasmine 放學後好開心咁去同個King屎仔拖住手咁放學

Joanne有d不甘心咁講「呀...呢個F.1小妹妹都有男朋友啦，我幾時先可以出pool呀...」

「妳一向多人追喎」

「d男仔係鍾意我個胸同長腿者，次次一埋黎就流晒口水咁，如果我應承佢地嘅話，一定好快捉我去開房啦」

「咁呢兩樣係妳必殺武器嘛」

「唉，男人~」

經過果日之後兩星期，有一個星期一Jasmine成個人落晒型頭耷耷咁返學，佢之前d傲氣完全冇晒

我係課室自己發咗逗果陣，Ivana衝入課室

「Jessie!!!有冇見到Jasmine呀?佢成個人唔同晒，頭耷耷咁返學喎」

「冇見呀，做咩呀?」

「今日有人見佢頭耷耷咁樣返學，對眼又腫晒咁樣」

「同男朋友分手掛，細路女一定會有d咁嘅事架啦」

我係小息見到Jasmine果時，佢真係自己一個靜靜地咁坐係課室，緊緊捉實自己件衫，佢好似俾人打完一身咁，此時，Miss孔係我地身邊出現

「妳呢個大姐姐做咩係到裝F.1師妹個課室呀」

「呀..Miss孔...我見Jasmine好似有d事，佢好似俾人打完咁...我諗緊洗唔洗叫社工黎」

Miss孔望一望入去再講返「唔洗，老師會處理，妳地唔洗理太多」

「係...知道...」

不過好奇怪，放學果時，我地三個又見到Jasmine好開心咁捉住個男仔隻手向HKU方向行，果個男仔仲要好高，又幫Jasmine拎書包

「嘩!!!!個F.1妹咁快換畫嘅!!仲要個咁高大嘅男仔喎」

「呢D咪叫犀利囉，佢過幾年之後都唔知會唔會有人渣車黎校門接佢放學添呀」

但我係遠距離一望，果個男仔好似一個熟人.....我一個小學同學，可能睇錯啦，我D同學應該唔會咁

大膽黎接女仔放學嘅

「喂Jessie!!有咩望呀?」

「冇呀!!行啦·返去做功課啦!!!」

「又做功課!!!」

「定係妳想去我爸爸到打針?」

果排放學，我地都見到Jasmine會俾個大哥哥接放學，有時仲要係幾個一齊接佢走

「嘩...呢個小妹妹吸引到咁多男仔架」

「我真係要同佢講一聲佩服囉」

「喂，果個咪上次打波班男仔囉」「係啫」

原來Jasmine已經好快收服左一大班男仔，佢真係有前途啦。不過到左兩星期後，所以關於Jasmine嘅迷都解開晒，點解佢可以係學校目中無人，點解佢唔怕恐怖雞，終於一一解答晒。

果日係星期五，大家好期待嘅日子，不過有少少奇怪感覺，校門只有Miss孔一個充滿殺氣咁企係到，而好多老師都落晒黎操場

「嘩!!六國大封相呀?」Ivana同Joanne不停咁望住校門

「唔知咩事呀，但係Miss Lee陪住Jasmine，好似有事發生咁」

「Jessie妳去問下咩事啦」

「我去?點解係我呀?」

「妳係模範生丫嘛，去啦」就係咁，我就俾佢地兩個推左去Miss Lee到

「Miss Lee?仲未放得學?」

「Jessie?妳去同d同學等陣啦」

我行埋Miss Lee身邊，終於見到Jasmine頭查查咁企係到，佢仲要好緊張

「同學，妳冇事嘛?」

「Jessie姐姐...我冇事，我一陣要向訓導主任認錯，我做左件好錯嘅事」

「咁妳肯認錯就一定冇事，Miss孔嘅綽號係難聽d，但佢係為我地好先至咁惡，唔洗怕架，我同Miss Lee陪妳過去丫」

「唔該晒姐姐.....」

「妳叫咩名?」

「Jasmine...F.1A，張詩敏.....」

“張詩敏.....個名好熟.....好似唔記得邊到聽過”

我同佢行到Miss孔面前，真係連我都有少少驚，但身為師姐，唔可以退縮!

「Miss孔，呢位同學想同妳認錯，希望妳可以原諒佢」今次我真係坐係超等席到欣賞獅哮功啦，因為Miss孔嘅殺氣不停咁傳出黎，睇黎Jasmine一定係犯左超級大錯

「Jessie妳同Helen企係到做證」

「知...知道...」

同時間，我地位大師姐Miss Lee都開口啦，終於，Jasmine嘅迷團終於解開啦

「Jasmine，我同Jessie姐姐都係到，妳有咩要同媽咪講架？」

「媽咪?Jasmine...妳係...」原來我眼前呢個小妹妹，就係Miss孔最錫嘅獨生女。我望清楚少少，佢地兩母女真係好似樣，如果將Jasmine條辮拆落黎，佢基本上係後生版嘅Miss孔，當年被稱為校花嘅Miss孔，原來佢個女都係咁靚

「冇錯Jessie，呢個係我獨生女，我嘅心肝寶貝、掌上明珠，Jasmine妳講俾姐姐聽妳做錯d咩」

「我...瞞住媽咪，同男仔拍拖，俾佢係街上邊摸我屁股同個胸...果時我仲著住校服...」

「Miss孔...咁樣...」我聽一聽發生咩事之後，都唔知點反應，因為呢個真係好大好大嘅錯，係嚴重影響校譽嘅事

「Jessie妳身為學校模範生，妳覺得應唔應該原諒佢？」

「Miss孔...我認為...Jasmine係一時好奇，細路女剛入青春期係會反叛d，以老師角度，應該要俾教訓佢，以媽咪角度...可以俾次機會囡囡」

「我已經將呢個女趕左出屋企一個月，妳認為罰得夠唔夠？」

一個月?將自己個獨生女趕出屋企一個月?叫佢係恐怖雞都真係益左佢啦，仲要用藤條打?我拉一拉高Jasmine條裙，的確仲見到少少未散嘅藤條印，究竟佢用藤條定棒球棍打個女?

「夠啦Miss孔，佢應該會知錯架啦，而且妳仲用藤條打左佢一身，Jasmine快d同媽咪道歉啦」

「大師姐，Jasmine應承晒所有老師架啦，妳念在陀佢咁辛苦，念在Sally姐姐份上，妳原諒佢一次啦，佢日日上堂都專心唔到，妳以前做我班主任果幾年，我見住妳有幾唔開心，到妳陀住Jasmine果陣妳好小心先可以生到佢出黎，我地成班同學都當佢親生妹咁睇，妳就當俾個面子我地呢班學生，原諒我地個妹妹好嘛，我地成班教職員都簽晒名原諒佢架啦」

Sally?我腦中再響起當年小學果句

“我地英華女校出黎嘅人，唔會咁易就會被失敗打低，Sally非常堅強，佢要樹立榜樣俾對仔女睇”

唔通佢父母同恐怖雞有咩關係?等等?Jasmine叫張詩敏，當年係小學門口.....

「我叫張詩敏，今年5歲，讀K3A班」

唔通呢個女仔...就係當年果個小妹妹？

「Helen，妳講佢知當年我點教妳地，做錯事要點」

「Jasmine，妳媽咪當年教我地成班，做錯事要大聲道歉，承認自己做錯。認錯唔係男人專利」

「對唔住呀媽咪...我以後唔敢啦」Jasmine偷偷泣泣咁細聲講

「大聲d，我聽唔到!!!」Miss孔好大聲咁講，全校目光集中係我地幾個身上

「獅哮功呀Jasmine，妳係佢個女，妳一定識」我細細聲係佢耳邊講，我真係想知佢有冇得到恐怖雞嘅真傳，係，我今次比較貪玩

佢吸左一口氣，用佢媽咪招牌嘅獅哮功大聲講左所有事出黎，原來佢真係獅哮功傳人黎

「對唔住呀媽咪!!!我以後都唔敢瞞住妳同男仔拍拖架啦!!!我求妳俾我返屋企啦!!!我係外邊一個月....我知錯啦!!!」講完之後，就係Jasmine悟住面嘅喊聲，係大聲到全部都聽到，同時亦話俾全校同學知，恐怖雞個獨生女，小恐怖雞就係佢

“佢係...恐怖雞個女?” “小恐怖雞?” “佢將自己個女趕出屋企一個月?” “好恐怖呀...”

「媽咪....我求妳俾我返屋企啦.....」Jasmine仍然悟面喊緊，俾媽咪趕出屋企成個月，真係好慘嘅，所以我都幫佢求情

「Miss孔，我諗Jasmine真係知錯架啦，妳就原諒佢一次啦」

係呢個時間

「Miss孔!」係一個素未謀面係同學

「點樣!!!!」Miss孔以獅哮功回應，但係呢位同學竟然唔怕，仲反擊

「妳囡囡已經知錯啦，如果唔係佢就唔會係咁多人面前同妳道歉同喊，希望妳以媽媽角度出發，我地任何人都犯過錯，只要知道自己錯咩，唔好再犯就得，我相信妳囡囡已經受到教訓，妳就原諒佢一次啦」

「Miss孔，原諒Jasmine啦」有好多同學附和

恐怖雞靜左一陣...

「Jessie!!過黎」

「係!!」

「我個女所犯嘅事，係學生之中我希望只有妳一個知道，我唔想佢俾男仔摸均全身嘅事俾任何學生知，有冇問題??」

「係...我知道...」

終於，恐怖雞肯原諒自己個女，我睇得出佢真係好緊張好錫Jasmine，恐怖雞係一個好媽媽，一隻好母雞

「我知錯啦媽咪.....」

「姐姐帶妳返屋企先，今晚我先再慢慢教訓妳，Jessie，妳地可以放學」

「知道...Jasmine，妳要乖乖地啦，妳有哥哥同姐姐咁錫妳」

「知道Jessie姐姐」

正當我轉身走果時，Jasmine叫停左我

「Jessie姐姐!!」

「係!!咩事?」

「我...我唔會輸俾妳...」

「唔?發生咩事?」

「遲d過幾年...我好大機會...會同妳爭一樣野... ..雖然我知妳一定會贏我...但我唔會認輸架!!」

我微笑左一下「咁我等妳向我挑戰啦」

當我行返去Joanne佢地身邊時，佢地都非常八卦，我地返屋企時佢地不停咁問我

「Jasmine真係恐怖雞個女?」「因咩事俾恐怖雞趕出屋企呀?」

不過我應承過Miss孔唔會講件事出黎，就一定唔會講，講左嘅話我怕我連命都冇

Jasmine同恐怖雞兩母女，應該同佢屋企有關係...因為當時，Jasmine契家姐企左係佢身邊，佢叫程逸怡

林雪凝日記(10)

11-12-1999

今日等放學之時，我地見到Jasmine好似要向恐怖雞認錯咁樣，我無啦啦就俾Miss孔捉住左要做證

原來Jasmine係Miss孔個獨生女!!!怪不得佢生得咁靚!!不!當我一聽到佢做錯咩事之後，就知佢犯左死罪啦

佢竟然著住校服同男仔拍拖，仲俾人摸胸同屁股，呢個罪名係Miss孔心中，應該唔止係死罪，仲要誅九族添

但係Miss孔話佢已經將Jasmine趕出屋企成個月，仲打左佢一身，呢個應該係佢俾囡囡最大嘅懲罰啦

Jasmine係學校好大聲求Miss孔原諒，公開左佢係Miss孔獨生女嘅事

原來Jasmine都識獅哮功架，睇黎我都係唔好惹佢比較好。其實Jasmine人緣都唔差嘅，佢好肯幫同學，特別係未曝光之前，佢會為同學向佢媽咪求情，如果有唔公平情況，佢都會企出黎，所以，在場好多同學都一齊為佢求情

好囉，Miss孔肯原諒佢囉，不過好奇怪，Jasmine話過幾年會同我爭野，我同佢有咩共通點呢?應該唔會爭男朋友丫.....

當Jasmine離開學校果時，係有一個女仔陪佢走，果個女仔，我以前見過，係佢家姐，逸怡姐姐。怡姐姐比起以前更靚女，咁即係...Jasmine係識佢?

如果我想搵佢，係咪可以搵Jasmne幫幫手呢?

F.4時，我學校每年一度嘅Christmas ball，都會要同學幫手，今年我地三個去左做helper，因為我地成日聽d師姐講，學校christmas ball係好grant，好多外校男仔黎，所以我地就主動去做helper，今次我係負責賣花

係christmas ball嘅花檔，我著住舊年表姐結婚時我著嘅粉紫色伴娘裙，加白色高踭鞋係到做賣花女

「喂!Jessie!!生意點呀?」

「呀...仲未發市呀」

「都未係時候，一陣開始跳舞果時就忙到妳死架啦」

「妳話會唔會有人請我地去跳舞丫啦?」

「好大可能架，特別係Jessie妳啦」

「我?關我咩事呀?」

「平時成個村姑咁，原來妳打扮起上黎都好靚架喎」

「痴...痴線啦，我個妝咪又係妳幫我化」

當我去完洗手間出黎，現場已經開始跳舞，好啦，係我開工嘅時候啦

點知一入到場，我未埋到花檔，已經有個男仔埋我身邊，請我跳舞。我當時立即呆左，現場仲有幾個師姐好驚訝，最後，我拒絕左佢。到後尾我先知，果個男仔係皇仁F.6嘅10A狀元。

「Jessie妳連10A都拒絕呀?」

「咁...我今日係賣花女嘛...點可以失職架，中文都有教啦，敬業與樂業丫嘛」

「D師姐好羨慕妳啦，有人請妳出去」

過左一陣，又有另一個DBS男仔黎花檔

「同學係咪買花呀?」

「呀....係呀，想問問呢」

「係?」

「同學妳鍾意咩花?」

「我?」我真係一臉迷茫

「係呀，我想送花俾妳，再出去請妳跳舞，請問有冇問題呀?Jessie，林雪凝小姐」

「你...你識我?」

「哦...妳果兩個同學講我知架」

我望一望Joanne同Ivana，佢地都俾signal我，叫我把握機會。我亦以一個抱怨眼光望返佢

「sorry呀...我...唔識跳舞，而且我今晚係一個賣花女」

「呀...冇所謂，咁妳鍾意咩花?我可以送俾妳嘛?」

「今日現場冇我鍾意嘅花係到呢，唔好意思，或者你去邀請其他師姐丫」

當佢行開之後，果兩個媒人婆又走過黎啦

「妳連DBS都睇唔上眼呀?」

「咁...無啦啦黎請我，唔好啦」

「妳呀，連續拒絕兩個男仔，妳開始出名啦」

「出咩名呀?」

「林雪凝，人如其名，冰山美人」

「妳地兩個幫我改咋?」

「唔係架，係D男仔同其他人講咋」

「拿...又有男仔想黎啦，妳今次仲拒唔拒絕呀?」

「我真係突然好想恐怖雞係我身邊保護我，再黎再拒絕」

結果我果晚拒絕左不下10個男仔同TB

之後我個名就開始係其他友校中流傳，英華女校、冰山美人、Jessie林雪凝

難得有一日放學，我地幾個冇事做，測驗完畢都想放鬆下，但係學校籃球場上，就有好熱烈嘅氣氛，因為有一堆男仔出現左。

當日係我地學校約左間男女校嘅女子籃球隊進行一場友誼賽，所以佢地嘅男子籃球隊，就黎幫手打氣(可能係做苦力幫女仔拎野，或者入黎女校見識下)

「咦，佢地幾個咪上次輸野飲俾我地d男仔囉，今日樂善堂黎友誼賽呀？」

「Ivana妳想留低睇？」

「順便去呃下野食都好呀，Jessie一齊黎啦」

「下!!!又關我事？」

「行啦!!!」我就咁俾佢地兩個捉左去睇波，同埋走近佢地一班男仔到

但係我地埋到去，就已經見到Jasmine坐左係班男仔之間

「Jasmine?妳坐係到做咩呀?妳唔怕俾媽咪鬧？」

「我邊會怕呢?媽咪知道我呢d都係教我打波嘅大哥哥，而且，應該佢地更怕我媽咪先係啲」

咁佢又冇講錯嘅，有邊個夠膽係我地學校入邊，公然蝦訓導主任個獨生女?

「但係妳唔坐返我地學校果邊，妳唔怕俾籃球隊d師姐鬧妳咩？」

「Jessie姐姐，乜妳認為而家仲有師姐敢係學校範圍內蝦我鬧我咩？」

Jasmine佢講得冇錯，自從上次佢自爆左之後，好多同學都怕左佢，小恐怖雞啲，所以有時Jasmine氣焰仲犀利過之前

「妳地三個唔坐低一齊睇？」

「我地企得啦Jasmine」

「Joanne姐姐妳小心啲，呢到全部都係色狼，除左我身後呢件怕羞仔之外」

「Hello三位女俠，我地又見面啦」

「怕羞仔你就冇用啦，射Key輸俾Ivana姐姐，拎唔到人地電話」

「下...詩敏...我冇打算...即係呢.....其實...」

「得啦得啦，唔玩你啦，一陣我怕你過度怕羞爆血管呀」

「Jasmine · 咁佢地有冇野請我地食呀」

「怕羞仔!!!拎d雞脾魚旦之類請三位靚女師姐食」

「知道!!!」

Jasmine就好似公主咁點怕羞仔做野

女子籃球隊，係我地學校精英份子之一，不過佢地實力係一般，去到學界總唔會第一場就輸嘅...至少打到去8強啦，但係對手就比較犀利，長年同我地學校死敵協恩同GHS係學界打到好燦爛。今次搵佢地黎做友誼賽對手，唔知係想增加士氣定點啦，都叫有個好開始嘅。但係對方嘅後備席同埋男子籃球隊果邊，好似唔太介意佢地落後緊咁樣

「咦?我地學校今年咁勁嘅?拋離對手十幾分以上㗎」

我呢D唔識打波嘅人，點知道對手實力呢

「Jessie，妳唔見對手好似好輕鬆咩?」

「少少咁啦」

「佢地呢班係後備球員黎架，正選果班仲坐係場邊，冇換衫」

「咁Jasmine身邊果d呢?」

「佢地係男子籃球隊，學界長勝將軍之一，而且有傳聞佢地最勁果d男仔係冇入校隊」

「估唔到對手咁勁㗎」

「樂善堂書院，妳話佢讀書差又唔係，運動差又唔係，好難界定佢係咩類學校」

比賽繼續，我地學校仍然領先緊，仲打得好順，當TB隊長入波果時，都傳出好多fans叫聲，其實聽Joanne講返，佢一直好想向Jasmine報仇，但奈何佢知道Jasmine係小恐怖雞之後就苦無機會，今次，終於俾佢搵到個機會出黎啦

當佢一次走籃得分之後，佢走到Jasmine面前，指住佢叫佢落場。佢係我地學校，係對方學校嘅座位上指住我地自己學校同學，呢個畫面都好有趣，不過阿sir未必俾啦

所以TB隊長都落足鞋油俾對方教練

「妳地想Jasmine妹妹幫我地?佢唔係我地學生㗎」

「王Sir，我知佢係你地學校籃球隊教出黎，我想睇下，佢有冇資格幫我地落場，咁都唔得?」

對方教練同我地學校體育老師張sir傾左幾句之後，竟然將個波交左俾恐怖雞

「如果Miss孔批准嘅話...我地都冇問題」

睇黎現場所有人都好怕恐怖雞

「媽咪!!!我可唔可以幫阿哥學校落場呀?」Jasmine係操場嗌上訓導處，其時已經有陣冷風吹到落場

「妳自己小心d，唔好整親」恐怖雞開綠燈了

於是Jasmine好快就換左套籃球衫出黎，竟然，係同對手一模一樣，印住佢生日日子15號，加埋佢個英文名「Jasmine」，同埋底部印左另一個名「Anthony」

TB隊長今次又計錯數啦，Jasmine落場比賽之後，我地學校領先嘅分數好快就俾人追返，Jasmine打籃球同讀書都好叻，佢而家係到話俾所有人知，佢係用自己實力考入我地學校。
TB隊長嘅報仇大計可能真係要落空啦，因為Jasmine真係唔放佢地在眼內，佢同樂善堂班女仔夾得非常之好

「點解...Jasmine好似同你地咁夾嘅？」

我忍唔住問身邊嘅怕羞仔

「其實...唔...詩敏一開始係唔識打波，自從舊年佢哥哥開始帶佢黎打波之後，我地成班男仔慢慢教佢，有時佢又同女子隊一齊打波，所以同我地先咁夾」

「話佢係你地學生都有人信」Ivana已經食到第二隻雞脾，佢真係食極都唔肥

「其實詩敏最夾果個係佢阿哥，不過佢今日冇黎，所以妳地睇唔到佢兩兄妹最恐怖一面」

「佢哥哥?佢係獨生女黎啫」

「應該係佢契哥先啫，前排詩敏就係寄居係佢家姐阿哥到」

「咁如果佢阿哥黎到會點？」

「佢阿哥呀...佢係到嘅話就只會不斷見佢地兩兄妹射3分」

「兩兄妹都好準？」Joanne呢位球評家開始對Jasmine阿哥產生興趣

「佢阿哥綽號三井壽，當然我地仲有個神宗一郎冇黎」

「點解佢地唔黎呀？」

「佢地上堂馴覺，俾人罰留堂」

估唔到...佢地唔黎原因係咁樣

完場啦，我地學校籃球隊輸左係自己學校同學手上，Jasmine得分同助攻都比TB隊長多

體育張sir再一次問Jasmine入唔入籃球隊，Jasmine都係擰擰頭，原因:媽咪唔俾。所以張sir都唔敢再叫佢加入

「喂!Jessie!!Ivana!!!補習天王暑期班有優惠呀!!!三人同行一人免費呀喂」

「其實佢係咪真係咁好架?但係又真係好多人補佢啫」

其實我都有諗過係咪補習，我怕補左冇用又浪費錢，始終爸爸睇症都好叻

不過我係呢兩隻魔鬼引誘之下，跟左佢地去報名，而我係用自己零用錢報名咋

但係暑假開始之前呢，我要返一返小學陪雪晴，因為佢準備升中派位啦。其實我早就知道學校Mark左雪晴去讀，根本佢冇可能派唔到我間學校。今日我同Ivana仲有Joanne一齊陪雪晴去睇升中派位

Lam suet ching- Ying Wah Girl' s School 林雪晴 -英華女學校

「家姐!!!我得左啦!!!!」雪晴真係非常開心

「好奇咩?我個妹妹咁叻」

「嘩!!我讀到傻呀!!」

「其實我學校早就Mark左妳黎讀啦，係我冇話妳知咋」

「搞錯呀!!!咁我讀得咁辛苦為左咩啫!!!」

「黎啦!!家姐請妳食野慶祝啦」

「我又要著妳d舊校服啦」

「慳錢呀傻妹!!」

第二日ba

b專登休診半日同雪晴去註冊，而我就係學校做helper，今日係校門等緊雪晴嘅唔係我，而係...恐怖雞!

雪晴仍然好似平日咁跳下跳下好開心咁返學，完全唔知道Miss孔已經一早企係校門觀察來年新生，雪晴一步一步咁踩入恐怖雞設下嘅陷阱，而我地三個就係課室用望遠鏡等緊呢套好戲上演

「廿蚊，雪晴中伏」「三十!!」

「嘩...妳地咁話我個妹架...我話佢冇事，50蚊」

「妳有冇教定雪晴d野架?」

「我只係俾左恐怖雞張相佢睇咋，希望佢識醒水啦」

「嘩!!!妳出千啲」

「咁唔通睇住個妹中伏咩」

不過今日Miss孔真係撓實雙手係到觀察學生，暫時唔見佢有行動。終於等雪晴一轉彎入校門果一刻，有事發生啦

當雪晴一踏入校門果下，佢就見到個著校服嘅同學坐左係到，個樣好唔舒服咁，果個係Jasmine，個頭又係未梳好，超亂咁樣

果個係恐怖雞設下嘅關卡，睇下有邊d新生係會好心去問下人有咩事。當然呢一關難唔到雪晴啦，因為今日ba

b都係到，身為醫生嘅佢，好快就叫雪晴扶果位同學入學校休息，而雪晴都好乖咁幫Jasmine咁梳頭同扎辮

等佢地差唔多行到去禮堂果時，Miss

Lee就係雪晴面前將一大堆簿跌左係佢面前，而雪晴都好乖咁幫Miss

Lee執好d簿，佢成功經過恐怖雞兩道關卡，當雪晴係到註冊果時，好多老師都黎望一望佢

終於雪晴完成註冊啦，佢要面對新校服嘅誘惑

「同學，過唔過黎度身試新校服呀？」

我地望一望，睇下雪晴會唔會想要新校服

「哦!唔洗啦，我家姐係到讀，我著佢D校服得啦」

「但係家姐果D舊啦喎，幫妳度身著靚D唔好咩？」

「真係唔需要啦，幫屋企慳下錢仲好，同理我家姐唔係高我好多，我著到佢D校服架」

雪晴慳妹性格又過埋新校服果關，佢好平安咁去到學會招人地帶，為左唔好嚇親佢，我地三個係禮堂門口等佢

「家姐家姐!!!我搞掂啦!!!妳走得未呀？」

「未啦，我落黎陪妳過學會地帶架，一陣好多師姐拉妳入學會呀」

「家姐妳去邊我去邊」

我地一家人慢慢行過訓導處，突然訓導處道門打開，有個頭伸左出黎，雪晴認得Jasmine

「唔?姐姐妳冇事啦？」

「我冇咩事啦，唔該晒妳」

「唔洗客氣，幫人係應該嘅」

「都啱嘅，既然Karen妳係到我就同多妳地兩姊妹講多次」

「唔?Jasmine?有咩事？」

我地兩個都有少少黑人問號

「我唔會輸俾妳地兩姊妹架!!」佢講完就好快返入訓導處

「家姐...果位同學做咩野?要挑戰我地?」

「唔知呀」

「妳同人爭男朋友?」

「傻啦...佢升F.2咋，我邊會鍾意D小朋友?」

「但係點解佢會係訓導處嘅?」正當我想解釋果時，Miss孔出現了

「妳就係林雪晴，Karen Lam係唔係？」

Miss孔嘅氣勢果然係強，雪晴都有少少驚左佢

「幾好，一入校門見到同學唔舒服就扶起佢，見到老師跌簿會幫手執，又會幫屋企慳錢，用家姐舊校服」

雪晴果陣仲係一舊雲咁「請問妳係……」

傻妹!!!我咪一早俾左恐怖雞張相佢睇囉!!!

「佢係呢間學校嘅訓導主任，孔美玲老師，綽號恐怖雞」Jasmine係訓導處伸個頭出黎向雪晴解釋

「詩敏!!好啦!!」

「妳...妳好...Miss孔...我唔知道...」

「唔緊要，妳嘅表現我好滿意，真係同傳聞一樣，妳地兩姊妹係心地好好，一對模範生」

「多謝Miss孔」

「9月1號，準時返學」

「係...」

「仲有唔好學家姐咁樣，係書包上邊掛公仔，為左隻公仔頂撞我」

「知...知道...」

「係...Miss孔...果陣對唔住...」今次連我陳年舊史都俾人掘埋出黎

「原來模範生Jessie姐姐都會為左公仔而頂撞媽咪嘅.....妳好呀林雪晴，我係訓導主任個獨生女，F.2 C張詩敏Jasmine，我綽號小恐怖雞」

「妳...妳好...」

「雪凝妳竟然咁頂撞老師？」

弊!!!我完全忘記左ba b係到

「啊!!林醫生你好，其實唔係大問題，當年Jessie非常保護朋友送俾佢嘅野，我都批准佢掛隻公仔係筆袋上邊」

「Miss孔...我想問下，係咪一隻粉紅色嘅羊駝公仔？」

「Karen妳真係咁好記性，冇錯，係一隻粉紅色嘅公仔」

雪晴以不懷好意嘅眼光望住我「家姐~嘻嘻~」

同時Jasmine都用少少妒忌眼光望住我

「係...麻煩晒妳啦Miss孔，我帶妹妹同屋企人走先啦」

極速帶雪晴離開學校，恐怖雞兩母女嘅功力果然好犀利

第一日去銅鑼灣補習，我都係著返長褲加t shirt算數，反正係補習，而唔係去相睇

我地三個拎左Notes就坐低聽下補習班天王講下書，都有d用嘅，主要教大家考試策略之類，不過佢點勁，都唔夠教英文嘅Miss孔咁勁，Miss孔係高聲叫同學出去拎試卷，仲要讀埋妳個分，如果低過80分，佢會一手扔走妳份卷，大家會受到二次傷害

但係現場好多男仔就係真嘅，咁我終於明白佢地兩個黎補習嘅原因啦，又係為左識男仔。好彩我早就估到，所以我先著到成個村姑咁樣

「Jessie妳做咩又成個村姑咁呀？」

「我唔似村姑，點解襯托到妳地兩個靚女呀」

「所以話，妳不愧為全級第一」

「係我了解妳地者」

「咁識唔到男仔嘅話，我地又可以自己補習，一舉兩得」

我係第一次去補習社，跟住佢地兩個坐低，先發現原來一個課室係坐好多好多人

我好專心咁聽補習天王解釋試卷，冇咩特別，相對Miss孔黎講，佢d技巧只係小兒科，不過俾左錢，就繼續上埋個暑期班佢啦

當落堂之時，我就發現全部人都係一次過好快咁走

「嘩...趕時間？」

「Jessie，而家12點，大家都趕住去行街食飯啦」

「原來補習社就係咁樣，大開眼界」

我地三個一齊行街，坐低再傾返頭先補習嘅事

「補習天王都冇恐怖雞咁勁」

「人地要佢考試技巧者」

「不過佢D技巧好普通，咁都做到天王?咁恐怖雞出黎補習會點呢？」

「佢呀?我怕佢俾人告添呀，係咁鬧人」

「不過呢...妳地兩個有冇睇中男仔呀？」

「已經有人睇中Joanne啦，睇黎下堂會坐我地附近添啲」

「哦~~果幾個男仔呀?佢地似想將我地三個打包添啦」

「點會睇中我呀?我今日已經好普通村姑Look」

「不如下堂Jessie妳打扮下啦，可能有男仔識妳呢」

「唔洗呀?」

「試下無壞嘅，莫非妳真係非佢不嫁?」

「係啲!!識妳咁耐，我一直唔知Jessie妳鍾意邊個男仔啲」

「邊...邊有呀?」

「哦~Joanne妳有冇聽過Jessie呢個模範生，F.1第一日返學就槓上恐怖雞?」

「我聽過呀，佢仲想即場除校章添」

「佢呢..就係為左佢筆袋果隻公仔，係佢初戀情人送俾佢嘅」

「嘩...初戀情人呀?」

我面紅紅咁低頭，完全唔敢直望佢地視線

「邊...邊係初戀啲...我同佢都有開始過」

「只係妳自己暗戀人地者」

「咁其實Jessie妳有冇送過野俾佢架?」

「我呀...我送過枝筆俾佢」

「點解送筆呀?」

「嗯...因為我覺得枝筆好襯佢，當年佢有隻錶好似好舊咁，我咪聖誕節送左枝筆俾佢囉」

「初戀呀~~我要初戀呀」 Ivana又係到嚟叫

「Jessie妳真係好浪漫呀!!!」

「又唔係咩名牌子....Parker墨水筆之嘛...」

「總好過送Pilot呀?」

返到屋企攤係床上，望一望隻公仔

你而家係到做緊咩呢.....仲記得我嘛？

第二次補習果日，天氣好熱，所以我決定著背心短裙加涼鞋出去啦，不過我都帶定件褸上堂用
果然我地一入到課室，上次想識我地果幾個男仔已經坐左係我地附近

「嘩...Jessie妳今日咁進取呀?背心短裙涼鞋，唔似妳喎」

「咁天氣熱嘛...我又唔係專登露肉」

「妳都露下對C奶出黎啦」

「唔露呀」

好快補習天王又入黎，大家又繼續上堂，但係今堂開始，已經有男仔瞭佢地兩個講野啦。落堂果陣，佢地已經同男仔傾去邊到飲野，所以佢地就拉埋我去

「下...我都要去?」

「幾位男同學，呢個呢係Jessie，係我地學校長年模範生加全級第一，標準村姑代表」

「唔係呀，Jessie佢幾靚女呀，呀...我係DBS嘅Jonathan，妳好」

「蝦...蝦佬」

「Jessie妳好好同人相處下啦，知唔知?」

「咪...咪亂講啦」

其實第一眼見到呢個男仔，佢都唔差嘅，經常微笑，上堂又靜又專心...唔...當識個朋友囉，冇壞嘅

我地幾個人一齊去食飯，順便行下街。Joanne同Ivana真係好似做媒人咁，係咁係到將我同Jonathan拉埋一齊，佢地唔記得佢地兩個同我一樣都係AO咩?

佢地兩個係到睇衫睇鞋，將D衫係咁比較，而我就每次都負責俾意見

「Jessie妳唔去揀衫?」Jonathan對於我唔去揀衫覺得有d意外

「我?我好少買衫，呢到d款唔啱我」

「妳今日...都著得唔差呀」

「我...平時好少咁著...今日太熱...所以先著成咁出街，平時我真係成個村姑咁架」

「村姑?點解咁講呀?」

其實要解釋自己點解叫村姑又真係幾....

「因為我經常都係睇書呀...溫書呀之類...好少參加課外活動，最多體育堂打下波」

「咁妳係文靜者，唔係村姑」

「咁有時我又係屋企煮飯...我地班同學已經好少會係屋企自己煮飯...」

「識煮飯嘅女仔，而家好少有啦」

「你讚緊我呀？」我笑住咁同佢講

「係呀，妳好叻」

「你過獎啦」

我同Jonathan傾得好開心，所有事都逃唔過Joanne雙眼

「喂!妳兩個咁好傾呀?」

「咁...妳地又掛住睇野」

我睇一睇錶「呀...我差唔多要返診所幫手啦，要返屋企換衫先啦」

「Jessie妳咁樣落診所唔得咩」

「妳地有冇見過診所姑娘著涼鞋開工丫」

「Jessie妳仲要做兼職呀?」

「唔係啦，佢爸爸係醫生，開診所。」

「咁妳地係咪一齊返去?」

於是我地幾個就一齊返去，而Jonathan就好有風度咁送我地幾個走，但當我換好衫落樓之後，就發現佢仲等緊我

「你仲唔返去?」

「都要送埋妳去診所架嘛」

佢送埋我入診所果一幕，就俾Ivana同Joanne望到，當佢走左之後，佢地就衝入診所

「嘩!妳兩個唔舒服呀?一齊黎嘅?」

「佢送埋妳返診所㗎，係咪有機會發展呀?」

「普通朋友者，咩有冇機會發展」

「但妳好似都有d意思㗎」

「邊係呢...」

「對人有好感?」

「咪理啦」

「哎呀~終於大個女啦」

「妳地係咪想打針呀」

「唔係」

佢地好快就走左，其實Jonathan係幾好嘅，有冇機會發展下？又唔可以話冇嘅

「姑娘姐姐唔該」

「係！睇過未？電話？洗唔洗探熱？好，坐低等陣啦」

「林醫生呢到d姑娘姐姐咁靚嘅？」

「呢個係林醫生個大女黎架」

「上次係到搗亂果個姐姐呢？」

「果個係細女」

林雪凝日記(11)

18-7-2000

雪晴今日終於黎左學校註冊啦，佢正式成為我地英華女校一份子，又要帶住呢個傻妹返學啦我

今日佢成功通過左Miss孔嘅關卡，睇黎呢個妹都應該會係模範生啦，haha

20-7-2000

第一次跟Ivana同Joanne去補習社補習...唔...個天王其實冇咩咁叻者，相比起Miss孔以下，恐怖雞有料好多，天王只不過係教下大家考試技巧，不過算啦，俾左錢，咪當係暑期活動囉。

27-7-2000

今日好熱呀!!!!我都忍唔住著背心短裙涼鞋出去啦!!!但係Joanne佢地一見到我就笑我呢。咩啱.....我都係女仔黎架嘛，我都想扮下靚架嘛，又係佢地講，我有少少身材，唔好收埋嘅

今日係補習班識左DBS嘅Jonathan，佢幾nice丫，係佢地兩個睇衫睇鞋果陣係我身邊陪我，之後仲好有風度咁送我地三個返屋企

點知我換完衫落樓果時，佢仲係到等我，送我返診所。當時我個心跳得好快呀!!!我會唔會對佢有意思架?

林雪凝!!!!妳唔乖啦!!!

返到屋企打開電腦，已經見到Jonathan add左我msn，而我同佢都開始傾計

佢同我一樣係理科人，不過佢入u想讀Global business，想出入CBD做財經界鉅子。其實個個人都有目標係好事，總好過一條咸魚咁

我同佢由普通學校事，傾到學校是非，開始慢慢傾心事。原來佢係獨生子，所以屋企對佢期望好大，而且佢係傳統名校，同學之間會好大比較，有時口和心不和，除左陳庭佳之外。

「Jessie妳地女校就好啦，可以成班同學咁老友」

「其實我地學校好多圈子架，只不過我唔去理佢地之嘛」

「例如？」

「好似有D有男仔追嘅同學，係學校就好高調，引黎唔少同學羨慕，又有D大胸同學成日教個胸出黎果D囉」

「妳唔係講緊Joanne呀？」

「Joanne佢有男仔追，不過佢好低調架，而且佢都唔鍾意人地，所以咪冇理到佢地囉」

「咁妳呢？妳都好似好多人追喎」

「我呢d村姑邊到會有人追呀haha」

「妳邊到係村姑者」

「你咪聽Ivana講啦，我之前係有人追嘅...不過我都唔鍾意佢，咪拒絕左人地囉」

「咁妳心中嘅對象要有咩條件呀？」

「唔...對我好，唔好呃我囉」

「咁妳拍過拖未呀？」

「當然未啦，你呢？有冇對象？」

「我呀？之前試過一次囉，不過三個月左右就分左手啦」

「因咩事呀？」

「唔知呀，死左都唔知咩原因」

我地兩個係暑假經常傾計，有時補完習之後，Ivana同Joanne會走先，掉低我地兩個人。同Jonathan相處時其實好舒服，今日補完習後，我地兩個約左行街

「Jessie妳鍾意行書局?」

「係呀，呢d舊書店有時會搵到我想睇嘅小說架」

「妳除左愛情小說，仲會睇咩書?散文?」

「唔...其實呢，我會睇原振俠」

我咁樣講完之後，Jonathan個樣有點驚訝，可能佢以為冇女仔會睇呢d小說啦。其實原振俠呢，唔止係科幻小說咁簡單，更加著重情感嘅描寫。原振俠係一個醫生，但係佢又非常鍾意冒險，佢身邊有唔少奇異怪事，但佢感情更加豐富，優柔寡斷，完全唔似一個醫生應有嘅決斷能力。但係我只係鍾意睇原版原振俠系列咋，新版果個第一人身寫嘅真係好悶，冇左原醫生應有嘅性格，只係打打打、殺殺殺。另外點解我鍾意睇原振俠?因為黎明囉...果陣佢套原振俠我真係買左套dvd係屋企煲架，果首主題曲，到而家我仲聽緊。

「妳一定係鍾意黎明啦」

「下?咁你都估到嘅!!」

「原振俠，我只係諗到黎明，冇其他人」

「估唔到你睇過嗰」

「當然啦，莫名同原醫生企係灣仔天橋頂上果幕我仲好記得架」

果日我買左本原振俠嘅小說返屋企睇

「今日妳唔洗去診所?」

「今日應承左同你行街嘛，所以咪同ba b講唔去診所，今日阿妹代我去」

「妳妹妹嗰，9月先升F.1，佢都去診所幫手?」

「佢為左賺零用錢嘛」

「但係唔怕佢搗亂咩?」

「D小朋友見到我妹妹都不知幾開心呀」

去到大約五點半，我地都係時候返屋企，因為我好少係街外食飯架

「唔...Jessie，陪妳坐電車返屋企?」

「唔?呢到坐電車?呢到西灣河嗰，而且好少車直去堅尼地城」

「咁呀...唔.....」

「你想陪我嘅話，我可以...唔...係上環行過去嘅，如果你唔怕遠」

「都得，可以陪妳，有咩所謂」

當我聽到佢呢句說話之後，我就開始諗，Jonathan佢會唔會...
我地一如計劃，係上環落左車之後，慢慢行返堅尼地城

「Jessie妳好鍾意係海邊散步？」

「係架，吹下海風冇晒煩惱，所以爸爸買個單位都要向海，俾我吹海風」

「妳都會有煩惱?妳係優等生㗎」

「唔係架，有時讀書讀到個腦實晒，塞唔到野入去，好辛苦架」

「妳可以打波放鬆下架」

「有時會同Joanne Ivana去打羽毛球囉，不過我地放學間唔中會去球場睇下人打波」

「唔怕俾球場d男仔瞭咩?始終球場比較雜」

「我地會揀學校睇人打波架嘛」

我地兩個慢慢行去西邊，我係眼尾見到，Jonathan其實係有d想拖起我隻手。所以我都緊緊守住自己右手嘅位。如果佢拖起我隻手我可以點做?係我地行到球場果時，我地見到一班男仔係到打波，當中都有唔少女仔，而其中就有一個熟悉嘅背影。佢係Jasmine。

當日佢扎起左條馬尾，著起套藍色嘅籃球衫，背後佢專用嘅號碼15號上仍然印有佢個名「Jasmine」，而號碼下就印有細細嘅「Anthony」

Jasmine坐係到望住一堆男仔打波，而佢就係到自己飲野，塊面打波打到紅晒嘅佢，頸上搭左條毛巾，佢乖乖地係到抹汗。Jasmine真係同Miss孔個樣一樣咁滯，臉尖尖配上長髮，話佢係校花真係冇講錯，當時我地學校兩大校花，F.4A有Joanne，F.1A就有Jasmine，可想而知當年Miss孔係有幾靚女。

而Jasmine果陣身邊坐左一個男仔，佢背後印住18號，Jasmine雙手撓實佢，又同自己條毛巾幫佢抹汗，之後將個頭挨向個男仔膊頭，果個應該係佢男朋友啦，果個男仔背影好眼熟，好似我小學一個同學，然後個男仔起身去左洗手間，而Jasmine都發現我存在。

「Jessie姐姐?妳拍緊拖呀?」

「我...我唔係呀，呢個...補習社d朋友黎咋」

「妳都要補習?補咩科?」

對住教自己英文個老師嘅女講自己補英文，有d唔係太自在

「英...英文...」

「英文?姐姐妳覺得我媽咪教得唔好咩?妳次次都係最後一個先俾佢叫去拎卷架啎」

「因為...Joanne叫埋我陪佢者...但係暑假之後我唔補架啦...所以...」

「得啦，我幫妳守秘密，唔會同媽咪講嘅」

「唔該晒...妳頭先身邊果個...係妳男朋友?」

「可以話係嘅，妳想見佢?」

突然間Jasmine警戒心好似提升左好多咁，好明顯佢唔想我見到佢男朋友

「唔係啦，我路過咋，唔...開學見啦，拜拜」

當我轉身之後，就聽到佢男朋友叫佢

「詩敏，今晚妳去我到喇呀?」 「係呀!!媽咪俾我去你到啦」

原來Jasmine

升F.2，Miss孔已經批准佢去男朋友到過夜，睇黎Jasmine個男朋友一定係一個好男仔，如果唔係Miss孔唔會俾佢心肝寶貝同男仔拍拖

我轉一轉身望Jasmine男朋友果一刻，佢已經同時轉身，佢男朋友件衫係印左18號，Anthony。而我心中果個男仔生日日期，都係18號，我同佢生日日子相差5日

「頭先果個係妳同學？」

「嗯，訓導主任個獨生女」

「佢幾可愛喎，好少女仔會同男仔一齊打波」

「我聽人講，佢跟佢契哥開始學打波，所以佢會同一大班男仔去玩」

「睇黎佢打波好叻啦，我就咁睇佢拍波果幾下，已經知佢基本功好扎實」

「Jasmine佢讀書同打波都好叻架，我有時都幾羨慕佢」

「羨慕佢？」

「係呀，佢又靚女、打波又叻、讀書又叻、又好多人錫佢」

「佢係學校好歡迎？」

「總會有TB想追佢，又有TB鍾意佢嘅」

「咁妳都應該會有人鍾意啦」

「呀...之前有TB追過嘅...不過我鍾意男仔...」

不知不覺我地兩個慢慢行到返屋企，Jonathan好有風度，佢會幫我拎野之類，其實佢真係一個好男子黎，我都開始有d心動，如果佢即時開口同我表白，我相信我會立即應承做佢女朋友架，我個心一直撲撲撲跳，等緊佢開口，但係到屋企樓下佢都冇出過聲。
返到屋企攤係床上，我立即放鬆左，究竟我係想同佢開始丫，定係唔想呢

「家姐家姐!!!」

「嗯?做咩事呀?」

「頭先果個係妳男朋友?幾好咁啱」

「邊...邊到係呀...妳見到d咩呀?」

「唔...我見到妳地兩個行到好埋咁返屋企囉，但係又未到拖手階段啫」

「總之佢唔係我男朋友啦」

「咁書檯上果張相呢?果個男仔係妳小學畢業果日同家姐妳.....嘻嘻嘻嘻.....」

雪晴嘅記憶力真係好，咁多年前嘅事佢仲記得，唔怪得佢成績比我更好

「妳咪理啦，總之妳家姐我冇拍拖」

「只不過係有個男仔追緊者，佢邊間學校架?」

「佢DBS嘅.....住九龍太子道果邊」

「嘩!!家姐!!!人家有錢仔啫」

「呢個先係問題，妳唔係唔知妳家姐我唔鍾意有錢人」

「錯啦家姐，妳唔係鍾意有錢人，妳仲係鍾意果個哥哥，我K2果時抱起我果個」

「妳...妳咁都記得!!!」

「我仲記得佢有個家姐同妹妹添」

「係家姐都契妹」

「咁家姐妳小心D啦，D契妹一定係鍾意D契哥嘅，特別係呢D青梅竹馬嘅契兄妹」

我好快咁轉身望住雪晴「妳講真架!?!」

「總會係咁嘅劇情嘅」

的確，我同Jonathan係close左好多，我都承認開始對佢心動，我覺得佢好叻，做事有條理，佢亦都好識照顧我，有一次我上堂又係著背心，佢大頭蝦冇帶風褸，佢就借風褸俾我著。另外有一次我補習又係著涼鞋，之後新鞋有d刮腳損左，佢又有膠布俾我。

Joanne同Ivana都不停係到叫我把握機會，因為好男仔真係唔多。正當我想同佢進一步發展果陣，果個男仔終於再一次出現係我眼前。

當日我地補習完，大家一齊去睇戲。唔知係邊個提議睇埋D恐怖片，其實都唔係好恐怖者，我地三個受過恐怖雞嘅嚴格訓練，所以恐怖片我地一D都唔驚，但係有D位我就嚇到捉實Jonathan手臂，而佢都拍一拍我隻手叫我唔好驚，果一下我覺得佢好有安全感，我可能真係對佢有意思啦。

睇完戲同食完飯之後，我同Jonathan明顯係行得close左，我再冇防範佢會突然拖我手咁樣，當我地行到維園果時，我地見到有一班好面善嘅人係到踢波，原來又係樂善堂波牛軍團，一如以往，Jasmine都會係到睇波。

「咦?果班係咪樂善堂班波牛呀?估唔到佢地唔單止打籃球，連踢波都有一手喎」

「Jasmine係到喎，佢真係好鍾意痴實班男仔，佢唔怕恐怖雞又趕佢出門口咩?」

「唔?Jessie，果班男仔妳地識嘅?」

「係呀，有次放學我地係海邊放鬆果時，Ivana走去挑戰人地射Key，俾佢贏左，之後呢班男仔就經常係我地幾個身邊出現，做晒我地跑腿」

「佢地打籃球同踢波都好犀利，我地學校近年來都係輸俾佢地」

「今日有埋球證喎，係咪比賽?」

「有球證就一定係比賽架啦」

「過唔過去瞭下佢地呀?」

「下?但係Jonathan係到...」

「我有咩所謂，咪當去宣示下主權囉」

「呀....Jessie，妳睇下Jonathan幾緊張妳，雙J戀開花啦?」

「妳地...妳地咪亂講啦!!」

當我地行到埋去時，怕羞仔已經見到我地，同時Jasmine都見到我

「三...三位女俠!!!妳地好!!!」

「你好呀怕羞仔，你地連波都踢埋呀?」Ivana一貫作風，係要玩到怕羞仔死先開心

「呀...其實呢...我地比較...」(下刪三千字)

「Jessie姐姐，妳係到做咩呀?」唔知點解，Jasmine今日對我好大敵意

「我地...食完飯，見到妳地踢波，所以過黎睇下妳地囉」

「呀...其實呢...我地踢完架啦...所以...」Jasmine好似極力想我快d走咁，但同時佢又俾一個男仔推左個頭一下

「白痴妹!!!妳阿哥去左邊呀!!!」我第一次見到有人咁樣叫Jasmine

「關你咩事呀!!賤人!!」我亦都係第一次見Jasmine咁同人講野

佢同個男仔可以話係火星撞地球咁，好多火花，仲差d郁手打架添

「問佢去唔去食野呀!!!!」

「我幫佢答你丫!!我地去呀!!得未!!」

「妳又去打搞佢呀?妳唔洗返屋企咩?」

「我返唔返屋企都唔關你事呀?而且媽咪俾我去家姐到腳，洗唔洗得你批准?」

「咁又係，妳俾晒機會妳阿哥房到腳」

「我又住你把口呀!!!」

Jasmine又真係好緊張佢阿哥，終於，一把熟悉嘅聲音同樣子再一次出現係我身邊，不過我只係見到背影

「熙哥!!!麻煩你....串少詩敏一陣啦好嘛」Jasmine哥哥雙手合十咁求佢同學，睇黎佢真就係Jasmine個男朋友或者契哥?我總係覺得佢地唔係兄妹關係咁簡單，我腦中又聽到雪晴果句說話

“D契妹一定係鍾意D契哥嘅，特別係呢D青梅竹馬嘅契兄妹”

我終於知道點解Jasmine會對我態度咁有攻擊性啦，佢唔想俾我地見到佢契哥/男朋友

「三位女俠，妳地係咪想我地請妳地食野呀?定係Ivana姐妳想挑戰我地個林源三呀?」

「咩野林源三呀?邊個呀」

「詩敏個阿哥囉...定係男朋友呀詩敏姐」

「我毒啞你丫啦!!!」

正當佢想轉身望過黎我地果邊時，Jasmine成個人跳高攞實佢

「唔准望女仔!!!佢地係我師姐!!!係咪想我叫媽咪黎殺死你地!!」

「唔望啦!!唔望啦!!好啦詩敏!!我去換衫啦，落返黎先啦好嘛」

Jasmine全程攞實佢唔俾佢望過黎，佢地d朋友應該講緊三級有味笑話笑佢地個動作，其實，我都偷偷地搵過日本av黎睇嘅...始終我都係正常女仔...我都會有...嘅

Joanne同Ivana亦都係到笑緊Jasmine果個動作，佢真係人細鬼大啦，當Jonathan送左我地返屋企之後，我地係msn到傾計

「丫，估唔到小恐怖雞個男朋友咁大個，應該同我地同Form」

「佢真係夠膽喎，但係果個應該係好男仔黎，如果唔係恐怖雞一定唔會俾佢同小雞來往」

「唔...都係嘅」

「做咩呀Jessie?妳羨慕小雞呀?」

「係囉，唔洗羨慕丫，妳有Jonathan呀」

「邊...邊係呀...咪講笑啦」

「但係妳同佢發展得好快喎，真係一D意思都有?」

「其實有少少嘅...不過...」

「不過妳仲係鍾意果個男仔?」

「嗯...佢話過，10年之後我同佢仲有聯絡對方，仲係朋友嘅話...佢會...」

「唔好同我講佢話會娶妳呀」

「嗯...」

「就係咁樣所以妳就等佢呀?Jessie呀!!!女仔青春係有限架」

「咁如果...佢仲係不停咁搵我呢?」

「妳點知佢一定搵緊妳?」

「我d小學同學話...佢一直都搵緊我，但係佢地唔想俾佢知我係邊...所以...」

「妳D小學同學真係好保護妳，但係妳對Jonathan都有d意思，真係唔打算發展下?」

「又唔係嘅.....其實我自己都唔知...」

其實我係諗過，當晚Jonathan同我表白嘅話，我係會應承佢嘅，但係，又俾我好似遇上心中嘅佢，真係好煩呀...

我自己一個係床到望住佢同我嘅合照，我竟然仲會鍾意佢...再諗一諗，佢同Jasmine應該一定有關係。當年係校門果個小妹妹同Jasmine一樣，叫張詩敏，再計返數，Jasmine係6-7年前應該係得果5歲左右...而當日佢同佢家姐一齊上左果部車，果位司機係...咁即係...我方估錯嘅話，Jasmine阿哥就係佢...因為當日係學校接走Jasmine果個，係怡姐姐。

我終於load到啦，Jasmine係佢同怡姐姐嘅契妹，即係...佢係Miss孔個契仔?

而根據雪晴所講，青梅竹馬嘅契妹，最後都係會鍾意自己個契哥，所以Jasmine咁講，要同我爭一樣野嘅意思係...佢會同我爭程逸風?即係阿風一早就知我係英華女校?
佢會唔會黎搵我?因為Jasmine嘅關係，我會同佢相遇?
係又點?佢都唔知係唔係仲鍾意我...Jasmine係同Joanne齊名嘅校花，佢笑果陣又好甜，身材又一定唔會差，點睇都好，阿風係會揀佢多...
咁Jonathan又點呢.....我個心唔係冇佢，但係阿風已經隱約係我身邊出現左...接受佢，如果阿風出現左，我又要點做?唉.....

當日我地補完課，準備係學校離開之際，係我眼前出現左一個好高嘅男仔，同一個大約165cm高嘅女仔，連同Miss孔一齊入左校務處

「唔?做咩會有男仔黎我地學校架?仲係恐怖雞陪佢」

「會唔會係d偷窺狂呀?我地件旗袍校服，有好多變態佬好鍾意架嘛」

「即係果個男仔係俾人捉到?」Joanne好似好期待咁樣，佢果日都係返黎Geog補課

一向眼力好嘅Ivana就持反對意見「唔係啲，佢拎住d文件之類，仲好似著住校服啲」

想像力超級豐富嘅Joanne諗到一d好驚人嘅理論

「會唔會係...女校男生?」

我同Ivana聽到佢咁講就好驚訝，點會有咁嘅可能?我地學校有個傳說，只要男仔自己一踏入校門果一刻，佢就會自動化灰

「唔...可能係其他事呢，我地學校F.6通常原班30人架嘛，點會咁易俾男仔入到黎」

我係到同佢兩個慢慢分析

「但係恐怖雞咪話過佢有個女校男生同班同學囉」

「咁都要有位先收到佢架嘛」

「如果真係有女校男生，咁妳地會點呀?」Joanne好奇咁講

以Ivana一貫性格，當然係玩到個男仔殘先，然後迫佢做跑腿，再強迫人地同佢拍拖結婚。果然真係冇俾我估錯，Ivana真係好好笑呀

「第一日就落佢迷藥，帶佢返我屋企扮大家做錯事，然後迫佢娶我」

「Ivana妳睇得電視太多啦」

「咁Jessie妳呢?」

「我?我呀?咪普通朋友囉」

我地三個慢慢行落山

但係我行落去果時，個腦諗嘅全部都係阿風

返到屋企我又見到隻公仔，終於...俾我見返佢，我8歲果年鍾意左佢，而家15歲半，仍然鍾意緊佢，

11歲果年小學畢業後就冇見過佢，估唔到...我仲係咁鍾意佢。

點樣聯絡到佢呢?直接搵Jasmine?佢一定唔會俾阿風聯絡方法我。如果搵Miss孔嘅話，就一定中地雷

第二日唔洗補習，我係會所溫完書之後，自己一個靜靜地行街

自從果日之後，我經常性會諗返起佢，我同佢終於重遇啦，但係要點先同佢相認返呢?

林雪凝日記(12)

1-8-2000

今日係我第一次單獨同男仔去街，估唔到Jonathan肯陪我去行書店，我係第一次聽到話有男仔鍾意睇書。

真係估佢唔到，佢聽見我鍾意睇原振俠就知我鍾意黎明，無辦法啦，黎明就係咁靚仔

今日我因為約左Jonathan行街，所以唔返診所幫手，佢本來想話搭電車送我返屋企架，不過由西灣河搭電車返屋企真係好耐，所以我地決定搭到去上環果邊，再慢慢行返去，唔緊要啦，我今日著Cons，又唔係著涼鞋

落左電車我地慢慢沿海邊行返屋企，有幾下Jonathan隻手係掂到我隻手，果一刻我發現，佢對我有意思，不過我選擇守住自己隻手，暫時我15歲女，唔計屋企人，只有佢掂過我捉過我隻手

我地兩個行到球場，就見到Jasmine，仲有佢男朋友，應該係啦，佢打波打到塊面紅卜卜咁樣真係好得意，怪不得佢吸引到咁多男仔。Jasmine男朋友起身去洗手間果時，佢轉身就發現左我同Jonathan，突然間佢將自己成個人企係我面前，好似想阻我見佢男朋友咁，我同佢傾左幾句之後，就聽到佢男朋友問Jasmine係咪去佢屋企過夜。原來Jasmine已經同男朋友去到呢個關係，果個男仔一定係好好，如果唔係Miss孔係唔會俾Jasmine拍拖。

10-8-2000

今日補完習，我地三個同Jonathan睇戲同食飯。睇戲果時我坐佢隔離，有幾幕我都嚇一嚇，之後捉實佢隻手，佢都好細心咁拍一拍我，叫我唔好驚，就咁睇，我地兩個就係一對拍緊拖嘅情侶

睇完戲我地去食飯，成餐飯中Jonathan都好照顧我，仲引黎佢地兩個羨慕，我地幾個食完飯就打算去維園散步，去到球場果邊，我地遇上樂善堂班波牛。而我係遠距離中，認出左一個身影，佢係球場上著住件比其他特別嘅衫，一個守門員，經過幾個撲球之後，佢地就好似完場，果位守門員就去左洗手間，同一時間，我地又再遇上Jasmine。今晚嘅Jasmine好奇怪，佢一向都係幾鍾意笑咁，但係今日佢見到我就好有攻擊性，好想快少少趕我走咁

然後...一個熟悉嘅身影係我眼前出現，雖然Jasmine好快跳上佢身上阻止佢望過黎我到，但我肯定我有認錯人，唔通佢係Jasmine男朋友?

佢...唔係話會娶我架咩?不過我都有資格話佢，我身邊而家有Jonathan

如果佢真係Jasmine男朋友嘅話....我同唔同佢爭好呢...

不知不覺，暑假差唔多完啦，今日上埋最後一堂英文暑期班，我就唔補習啦。Joanne同Ivana嘅計劃失敗左，識唔到男朋友，唯獨係我同Jonathan好close

「Jessie呀，過埋今堂就補晒啦喎」Ivana好似好心咁提醒我咁樣

「唔?有問題?」我仲係一舊雲咁樣

「可能今日Jonathan會表白呢」

「表白呀...我都未準備好...」

其實我唔係未準備好，我知道我自己個心仍然係佢到，所以我接受左Jonathan嘅話，真係會對佢好唔公平，因為如果突然間佢出現係我身邊嘅話，又會點呢

果然Jonathan送我返去果時.....佢對我表白了，佢送到我屋企附近海邊

「Jessie，其實...我有少少野...想同妳講」

微微嘅海風吹過我地身邊，我個心跳得好快好快，我低住頭等佢同我講

「嗯...有...咩事?」我專登唔望佢雙眼，我怕我會俾佢吸引左，令我應承佢，所以我決定點都唔可以望佢

「Jessie...妳覺得我點呀?」佢都係怕怕羞羞咁同我講，又好緊張

我望住海中嘅浪同佢講

「你...幾好呀...冇咩架子，又好照顧朋友」

「我係指.....做男朋友方面，我合唔合格呀?」

「男...男朋友?」

「係呀...」

「咁...你應該去問Joanne....佢咁多男仔追過」

「其實Jessie.....我...鍾意妳呀...」

「你...講真?」腦中出現左天使同魔鬼

天使：唔可以應承佢呀!!林雪凝!!!妳就快會考啦!!!仲有阿風呢?妳唔係話想嫁俾佢咩?

魔鬼：試下拍拖啦，有人錫好開心架

「Jessie，妳可唔可以俾次機會我.....做我女朋友?我地一定會好開心架，我唔會因為妳而唔讀書架」

天使同魔鬼係我心中角力，我真係唔知道要點揀。多年黎睇得愛情小說多，自然對拍拖有憧憬，如今有個男仔對我表白，俾著係其他女仔，好快就應承左佢架啦，係我心中仲係唔知點好之時，佢捉起左我隻手

「可以俾次機會我嘛」終於我忍唔住望左佢對眼，我個心跳得好快，就快俾佢吸走啦!!
係我準備開口講左「好」之際，有一部車經過並停係我地附近，車上播住我最鍾意聽嘅歌「天空之城」，再一次諗起點解我會扎雙麻花辮，我小學成日諗，如果可以同佢好似Pasu同Sheeta咁去故鄉兩個人靜靜咁生活幾好

Pasu夢想係飛行尋夢，而佢係小學一篇作文「我的志願」之中，佢話想自由自在係天空中飛翔，希望可以駕駛飛機，載乘客到唔同地方，佢志願係想做一個飛機師。

而我就為左支持佢，所以就決定成個小學生涯都扎起同Sheeta一樣嘅辮去支持佢

我諗左陣.....一個係我初戀情人，其實都唔知算唔算。另一個就企係我面前，係一個好好嘅男仔.....但係...我清楚知道我心入邊最鍾意果個係佢...所以...

「Sorry呀Jonathan.....我...唔可以應承你...我唔可以做你女朋友」我低住頭咁講

Jonathan一面茫然，佢可能冇諗過我會拒絕佢，始終成個暑假我同佢相處得好好，已經差一步就拍拖，而且我地仲單獨去過街食過飯

「係唔係.....我有d咩地方唔好.....我可以為妳而改架」

「Jonathan，唔關你事，你真係好好，係一個好男仔，我都認我曾經對你有心動過，如果你早一排同我講，我好大機會係會應承你」

「但係點解...」

「Ivana同Joanne有冇同你講過.....我小學果陣俾男仔表白過，錫過一次?」

「冇...佢地冇同我講」

「果陣我都係好鍾意果個男仔，由我三年級開始，到今日都係，由我8歲...我鍾意佢鍾意到15歲.....到而家7年，我升中學咁年黎都冇見過佢」

「咁可能係妳讀女校....冇機會識其他男仔者，妳都話咁多年冇見過佢...」

「唔係架...上次我地食完飯，係維園睇人踢波果陣，我已經見返佢，不過係佢見我唔到者...」

「樂善堂班男仔入邊?其中一個?」

「係... ..」

「但係妳肯定佢仲鍾意妳?點解妳唔可以揀妳面前嘅人?」

「因為我仲好鍾意佢，我唔想...同你拍拖果時個心仲會有佢係到」

「咁妳可以同我一齊再忘記佢...」

「Jonathan，我做唔到，我到今日...個銀包相格仲係放住佢張相...書檯仲係放住我同佢嘅合照...對唔住...我唔可以接受你嘅好意，sorry...」

我係佢手中，將自己隻手伸返出黎，再向後退幾步

「Sorry呀Jonathan...」

「Jessie，我希望妳可以考慮清楚，而且...我係真心鍾意妳一個，我唔會咁易放棄架」

「唔....sorry呀.....我要返診所啦...拜拜」

我極速跑返診所，入到去換返套制服就坐低嘆氣

唉.....真係有人同我表白.....我仲要又拒絕左佢.....如果仲有機會見面，實會面阻阻呢件事，Jonathan冇同Ivana同埋Joanne講，佢地知道果時，都非常驚訝

「Jessie妳真係拒絕左Jonathan呀？」Ivana知道之後真係非常驚訝

「係囉，妳明明話自己對佢有意思架，點解無啦啦要拒絕佢呀？」

「點解呀...唔...因為我心中鍾意果個唔係佢，如果我同佢拍拖嘅話，會對佢好唔公平」

「唔通...妳心中仲係鍾意緊小學果個男仔？」

我面紅紅咁樣對住佢地兩個點左下頭

「Jessie呀!妳點解咁傻呀?妳係到等緊一個未必會再見嘅男仔啫」

「係囉，Jonathan每一方面都好好，由家底到個人都差唔多滿分，妳咁都睇唔上眼?難怪妳真係俾人叫冰山美人啦」

「咁如果俾妳見返佢又點呢?妳主動追佢？」

「唔知架...到時再算啦...」

「Jessie妳真係傻得可愛」

「邊係啫」我又一次嘟長個咀

「咁Jonathan果邊妳打算點呀？」

「做普通朋友囉...唔係點啫」

不過Jonathan同我表白果陣，個樣係非常非常認真，我相信佢真係唔係玩玩下，係想認真發展，而且佢仲話唔會放棄，所以我都同Joanne佢地講，暑假班之後我唔去補習社啦。我唯一擔心嘅係，佢會走黎屋企同診所等我、甚至係學校，如果俾學校知道左，一定會有好大問題出現。

果然冇俾我估錯，有一日，Jonathan真係黎等我放學，佢真係唔怕Miss孔，佢著住佢地DBS校服，放學時間係我地校門徘徊

「Jessie!!!Jonathan係門口徘徊緊呀，佢係咪黎等妳架」

「下...我咪已經同佢當面講清楚囉，佢仲黎做咩呀？」

「咁...妳始終要拒絕多佢一次架啦」

「唔理佢啦，我去接埋雪晴放學先」

我帶住Ivana同Joanne一齊去F.1D到搵雪晴，當我地入到班房果時，已經有好多同學係窗邊望住

「家姐!!外邊有個男仔好似等我地同學放學呀!」

「咁Miss孔係咪唔俾我地放學呀？」

「咁又有講，始終果個男仔係DBS，點都要俾D面人地學校嘅」

「Jessie，大家有冇得放學就睇妳啦」

「下!!!!果個男仔黎等家姐妳放學架？」

雪晴呢句話係超大聲，累到我俾佢全班一齊望住

「佢...哦!!!上次送妳返屋企果個男仔嗰!!!係咪家姐妳男朋友呀？」

雪晴咁樣講，大家都好期待眼光望住我，搞到我好唔好意思，所以我選擇耍手擰頭say no

「唔...唔係呀...我同佢講清楚...我對佢冇意思架啦」

「Jessie妳咁唔係辦法，不如妳出去狠狠地拒絕佢啦」

「但係.....搞到大家連朋友都冇得做又好似...」

「有咩所謂，死纏爛打嘅男仔係最唔要得，反正暑假補習佢眼中只有妳一個，我地同佢冇朋友做都冇所謂」

「但係...」

「我地一大班姊妹落去陪妳，妳等陣」

「喂!!!!」

「Karen妳陪住家姐!!」

「知道!!」

「喂!!!」

佢地兩個好快就叫多幾個同學黎陪我放學

「Jessie!!唔好怕佢!!!呢d變態嘅男人唔好可憐佢!!」 「唔洗驚架!!我地咁多姊妹係到!!」

「家姐!!!我地成班30人一齊去陪妳呀!!!」

喂.....搞到我好似黑社會大家姐咁...唔係太好啱，不過有一個同學實幫到我，而且佢已經企左係雪晴班房門口

「Jessie姐姐，洗唔洗幫返妳一次呀?我叫媽咪黎幫幫妳?」

Jasmine已經係門口睇到晒一切

「Jasmine?唔洗麻煩到Miss孔啦...我唔想...」

「媽咪已經知道到啦，佢準備去盤問果個DB仔啦」

「Jasmine....我自己處理好啦...唔好麻煩到Miss孔」

「不論點都好，媽咪都會黎問妳發生咩事啦」

Jasmine咁講，即係俾佢媽咪有一個機會捉我入訓導處，我地幾個對腳真係震得好犀利

「點...點解...」

「妳地成棚人係到，係人都估到啦，姐姐妳自己去解決定媽咪去?」

「我去啦...」

Jasmine望一望訓導處「快啦，我去幫妳拖住媽咪先」

我自己一個人行到Jonathan面前，成班同學係校門睇戲食花生

「Jonathan...你...係到做乜?」

「我等妳放學架...」

「咁你而家等到啦，你快d走啦，訓導主任就快出黎，佢應該打緊電話去你學校」

「我黎係問妳一件事.....」

「我之前已經答左你啦，我對你冇意思...你咁做，我地連朋友都做唔到架啦」

佢再一次捉起我隻手，唔想俾我走返入學校

「Jessie...點解妳要咁?」

「你放手啦!!我同你講過我已經有鍾意嘅人，我會一直等佢，直到我唔想等為止」

點知Jonathan真係用左力捉住我，我覺得好痛...大叫左聲

「痛呀!!!」雪晴應該見我個樣有變，佢就隨手拎起枝羽毛球拍衝出黎

「唔好蝦我家姐呀!!!!」我回身一望，跟住雪晴嘅仲有Joanne同Ivana

雪晴一出到黎就打落Jonathan到

「你夠膽蝦我家姐!!!死變態佬!! 死變態佬!! 死變態佬!!」

雪晴不停向Jonathan揮拍，而Jonathan都推左雪晴一下

「呀!!!」雪晴俾佢推跌坐左係地下

見到自己個妹俾人蝦，做家姐點都要出手幫阿妹架啦

我一把打落Jonathan塊面到「你夠膽推我個妹!!!」

「Jessie....妳妹妹?我唔知道...」

Ivana同Joanne走去雪晴身邊陪住佢，雪晴痛到係到喊

「你蝦我妹妹，我點都唔會原諒你」

「Jessie妳聽我講丫」

突然間，殺氣四溢「DBS嘅同學，你想我點同你地學校講，你推我地學校F.1小妹妹呢件事呀?」

我地回身一望，以為係Miss孔御駕親征，點知，係Jasmine撓實雙手出黎，而佢身後，有兩個樂善堂嘅男仔

「怕羞仔!!佢蝦Karen呀!!Jessie個妹呀!!!」Ivana一見到怕羞仔就向佢求救

怕羞仔身邊果個同學聽到之後就上前望實Jonathan，不過怕羞仔就好似面紅紅咁望住雪晴

「D女仔叫你放手，你放唔放?唔好以為自己係DB仔就大晒」

「你唔係打算係人地學校門口搞事呀?」

「關...關你地咩事?」

「Jessie係我地朋友，你蝦佢個妹，點唔關我地事?定係你想我地叫埋同學上黎?好快架咋」

終於，Miss孔御駕親征了

「邊個咁大膽蝦我地學校學生!!!」

嘩...係十成獅吼功呀.....

怕羞仔一聽到之後就立即企係Jasmine身後，而佢亦俾Jasmine恥笑中

「呢位老師.....我....同Jessie傾少少野...」

「傾少少野?我頭先係上邊睇到晒!!你不單非禮Jessie，仲推左Karen一下，我而家有兩個樂善堂嘅男同學做證，你仲有得抵賴?」

「只不過係...」

「Jonathan Choi，我已經通知左你學校，聽日你自己好自為知!!!」

「Jonathan你走啦...你蝦我個妹，我今生今世都唔想再見到你!!!」我第一次用手指住其他人

怕羞仔好怕羞咁幫雪晴清理傷口，而雪晴都好乖咁忍痛，個場面都幾sweet，兩個面紅紅咁對望

「幫妳洗好傷口啦」

「唔...唔該哥哥...」

我帶住雪晴返入學校，而其他人都陸續返校內。不過我聽到怕羞仔同Miss孔對話

「係...Miss孔...關於佢..係有少少問題...佢最近食多左止藥藥...有時仲用安眠藥瞓覺」

「家姐知唔知?」

「家姐知道，但冇辦法處理，我地班主任遲d會黎拜候Miss孔妳，今日我地過黎同妳講左先」

「嗯...麻煩晒你地兩個，準備會考之餘仲要幫我照顧個仔同個麻煩女」

「唔緊要嘅，我地一場同學，而且今日我地都黎接Jasmine去打波，係未密集補課前休息下」

「同學記住，考試係重要，但唔好迫自己太緊」

「知道Miss孔」

「麻煩你地一陣送埋我個麻煩女返屋企啦」

Jasmine好快跟左怕羞仔去打波，然後Miss孔先再處理我地

「Karen妳有冇事?」難得恐怖雞會咁仁慈咁問

「Miss孔...我有事，擦損左少少者...」

「頭先妳地三個做咩要衝出去郁手?」終於又要受審啦

「頭先果個男仔整到家姐好痛...所以我點都要救家姐架啦」

「嗯...Jessie妳點解唔處理好問題?」

「Miss孔...我都唔知佢會黎學校等我....暑假果時我已經明確咁拒絕左佢...」

「嗯...我明嘅，妳呢d好女仔，俾人纏住係正常，如果下次再有咁嘅情況發生，要立即通知任何一位老師，今次妳好彩，果兩個樂善堂嘅男同學係黎搵我，佢地見到妳俾人蝦先幫妳手，妳地識佢地一班男仔?」

「係...Miss孔...舊年我同佢地打波果時認識，不過唔係成日見面，我只係知佢地教Jasmine打波」

「冇錯，詩敏個契哥係樂善堂到讀，果d係佢同學。Ok，冇咩事，妳地可以放學，不過Karen妳要返爸爸診所洗下傷口」

「知道Miss孔」

「今次妳地冇做錯，所以唔會落簿做紀錄」

「知道」

「走之前，每人拎份英文Past paper返去做，Joanne妳拎份History past paper返去，星期一果堂交俾我」

說好的冇懲罰呢？

林雪凝日記(13)

24-8-2000

今日係補習班最後一日啦，成個暑假我除左溫書同返診所之外，就係同Joanne & Ivana補習，其實去到第三次左右，佢地兩個已經飛甩我幫我同Jonathan製造機會。我真係對佢心動過，有幾次如果佢肯開口嘅話我係會答應做佢女朋友架。

但係上次我係維園見返佢，佢一貫係咁嘅笑容，做咩事都係一樣咁盡力，我仲好記得細個點解會鍾意佢架，佢好肯幫人，無論有咩事都好，佢總係第一個企出黎保護大家。雖然我同佢之間而家多左Jasmine係到，我都唔肯定佢地兩個係唔係拍緊拖，但我可以肯定我自己仍然鍾意佢。

係Jonathan送我返屋企果時，佢真係對我表白啦。果一刻我有d想應承佢，天使同魔鬼係我心中不停戰鬥。我同其他女仔一樣，係一個青春期少女，對異性有興趣係好正常，加上睇得多愛情小說，自不然會對愛情有憧憬。當時我只要點一點頭，Jonathan呢個咁好嘅男仔就會做我男朋友，係我望住佢對眼，就快俾佢吸走果時，我聽到「天空之城」呢首歌。Pasu係追求夢想而飛行，而佢夢想係做個飛機師，呢個就係我一直都扎麻花辮嘅原因，我想好似Sheeta咁係佢身邊陪伴佢。

所以我立即拒絕左Jonathan，始終我心中仲有果個男仔存在，我唔可以接受Jonathan。

10-9-2000

今日放學果時，Jonathan黎左學校等我。佢一企係校門就引黎好多人望住，如果我唔去解決呢件事，我諗大家都唔洗放學。Joanne & Ivana帶左好多同學黎陪我，而Jasmine就拖住Miss孔

Jonathan咁樣死纏爛打真係唔得，佢捉到我隻手好痛，之後雪晴拎起球拍出黎保護我，Jonathan竟然推跌雪晴，呢個係我心中係死罪黎架!!冇人可以係我面前蝦我妹妹。我咁大個女第一次郁手打人就係今日，我一把打去Jonathan塊面到，呢一次我同佢真係連朋友都冇得做架啦

正當Jonathan想纏落去之際，Jasmine帶左兩個樂善堂嘅男仔黎，當我一見到有男仔幫我地果時，我先識放心，因為出黎阻止Jonathan嘅男仔，係上次維園同Jasmine火星撞地球果個，我認得佢地，佢兩個都係阿風d同學。不過最後都係要Miss孔出黎收拾殘局

果兩個男同學同Miss孔講左陣之後，佢地就帶左Jasmine走

我地返到入學校都俾Miss孔問左好耐，好彩佢今次話我地冇做錯，唔會紀錄在案

估唔到Jonathan係咁嘅人，如果我當初應承佢做佢女朋友真係唔知會點啦

自從Jonathan騷動之後，我嘅生活回復平靜，而所謂嘅平靜，就係每日不停上堂、操past paper、補課、溫書，一星期做足七日咁滯，連一向體力充足嘅Ivana都嗌晒救命

其中一個星期五放學後，終於忍唔住，要去海邊自己一個坐低休息下，雪晴好識做，自己返屋企做功課先

我真係好辛苦好辛苦呀!!!!當日我坐左係海邊係到喊，雖然ba b話我讀唔讀到書都冇所謂，只要我唔行差踏錯、嫁個自己鍾意、對我好嘅男仔就得，但係我自己唔係咁諗呢，我係連續11年全級第一加模範生(拿...我唔打算加入政府架...唔好對號入座)，如果失手嘅話，會有好多人失望，自己老師、同學等等...所以我經常迫自己做到最好，最近仲開始馴得唔好，所以我好大膽咁做左第一件犯法嘅事，我上網查左安眠藥名，再係診所用電腦打左張醫生紙，再冒簽左ba b個名同吸左個醫生印，去左藥房到買安眠藥

我竟然第一次做呢d事，係刑事罪黎...俾人發現就一世架啦，會連累到ba b架...林雪凝...點解妳要咁做...

我自己不停係到喊...你去左邊呀!!!又話會保護我，又話會娶我嘅!!!

我愈喊愈大聲，然後，就有隻手摸我個頭，再遞包紙巾俾我

「唔該晒你」我仍然係到嗚咽緊嘅時候，我先知道，我俾人發現左我嘅罪行

「同學，麻煩妳將頭先買到嘅野拎出黎」

我聽到佢咁講果時，突然個身流出冷汗，正想轉身望後果陣.....

「眼望前面，將妳得到嘅野拎出黎」佢把聲好有威嚴，可能...真係警察...或者海關...

我手震震咁將樽安眠藥拎出黎...

「安眠藥嗰，有冇醫生紙呀？」

「有...有...」我將果張假醫生紙拎出黎俾後邊嘅人睇

終於忍唔住...大聲喊出黎

「張醫生紙係真嘅，同學，唔好食太多知嘛」

「知...知道啦」

「可能有個人同妳而家一樣咁辛苦咁努力緊，唔好咁易放棄」

「知道...」

「妳而家合理眼，數100聲，然後打開眼啦，樽藥我放係妳旁邊」

「知道...」

我依佢講，由1數到100後，我再打開眼，望一望身邊樽藥，已經換成一筒糖，而糖上邊貼左一張紙，我睇完之後，眼淚不停咁流出黎，紙上寫嘅野令我喊左好耐

「唔好放棄!細個妳請我食麵包，而家我請妳食糖啦!食糖補充糖份會精神多好多架!妳食太多安眠藥對身體唔好架嘛!微波爐」

係佢...佢認得我...佢知我係邊...原來佢一直都係我身邊，而且...佢仲係用我送俾佢果枝parker筆寫俾我，我拎住佢送俾我筒糖喊左好耐後，自己返屋企邊食糖邊溫書，果然好左好多，夜晚仲馴好左，然後星期一，我第一次俾Miss孔叫去訓導處.....

「Jessie妳坐低」Miss孔果日嘅殺氣都唔少

「知道...」

「妳最近係咪瞓得好差，壓力好大」

「Miss孔...妳點會知道...」

之後Miss孔將一樣野放係檯面俾我睇，我認得.....

「呢樽安眠藥，有人見到妳係藥房買，係唔係？」

「係...係...」

「呢隻藥需要醫生紙先買到，而醫生紙...妳應該好容易就拎到，妳每次唔舒服，幫妳開病假紙嘅都係林醫生，但我相信林醫生唔會輕易寫俾妳買安眠藥，佢一定會搵到其他更安全嘅藥物俾佢最錫嘅囡囡，而妳手上有妳爸爸嘅醫生紙，咁即係只有一個可能性...」

「係...係...」果時我已經震緊

「Jessie我希望妳可以坦白同我講，妳肯乖乖地坦白嘅話，我可以唔同林醫生講，我連Karen都唔會話佢知佢自己最崇拜嘅家姐會做出咁嘅事」

「知...知道...」

「妳手上果張醫生紙，係咪妳自己係診所偽造出黎」平時Miss孔嘅殺氣非常大，但係今日就完全冇晒果種殺氣，相反，我感受到佢舊年攞實Jasmine嘅氣息

「係...Miss孔...呢張醫生紙...係我係ba
b診所返工果時...自己偷偷上網查藥名再用電腦打出黎，然後...然後...冒簽ba
b個簡簽再自己吸醫生印...」

我講完後已經好似Jasmine咁雙手捂面咁喊

「Jessie，我對妳好失望，點解妳要做呢d野出黎」

「對...對唔住.....」

「當年妳可以為左隻公仔而頂撞我，點解妳而家冇勇氣去面對問題？」

「係...」

「呢樽藥...妳知唔知係邊個俾我？」

「係...程逸風?」

「冇錯，個DB仔黎搵妳果日，程逸風兩個同學黎搵我，就係話我知佢要用安眠藥瞓覺，連逸怡同詩敏都阻唔到佢，所以佢D同學先黎搵我，我亦都追殺左佢好耐都搵佢唔到」

「係...」

「我估唔到連身為我地學校模範生嘅妳都要靠安眠藥瞓覺，妳兩個真係天生一對」

「Miss孔...我同佢...其實...」

「妳地後生子女嘅事我明我亦都知，我都知妳地讀書會辛苦，但我唔希望妳地要用安眠藥呢d危險方法去放鬆自己」

「係...知道...」

「阿風為左妳，佢上星期六自己將呢樽藥拎去我屋企，連同佢自己果d藥，佢俾我同我先生鬧左好耐，而家我屋企總共有差唔多5樽安眠藥係到」

「5...5樽?」

「妳呢樽未開，連同阿風開左果d，總共5樽，佢食安眠藥止痛藥多過妳」

「係...」

「呢件事我當冇發生過，將果張醫生紙交出黎」

「係...」我將果張假醫生交出去之後，Miss孔就係我面前碎左佢

「妳所做嘅事，我當唔知，妳有咩想問?」

「阿風佢...而家點呀...我差唔多5年冇見佢」

「佢幾好，F.3轉校後開始努力讀書，原因我唔方便講，不過佢比妳辛苦好多倍」

「係...」

「同理佢仲認得妳，仲記得妳，如果唔係，佢就唔會由藥房一直跟到妳去海邊」

「咁...佢而家係邊?我想見下佢」

「妳知佢讀樂善堂，妳亦都見過佢踢波打波，其實佢都見到妳，只不過佢唔想，應該係話佢仲係覺得自己同小學對妳講最後果句說話一樣，襯唔起妳，所以佢唔黎搵妳」

「點解...」

「妳地年輕人嘅事，妳地小心處理，我唔會偏幫詩敏，我希望妳地知道，咩先係最重要，冇冇問題?」

」

「係...我知道..」

「有咩事，妳想見佢嘅話妳可以黎搵我，不過要等會考後先再算，知唔知？」

「知道...」

「Jessie妳唔好再行差踏錯啦，知道未？」

「係...我知道」

「呢到有份英文Past paper，卷一卷二，做完聽日英文堂交俾我啦」

「係...」最後我咪又係俾佢罰...

當我行出訓導處時，就見到Jasmine撈埋雙手係到等我，我行過佢身邊時，佢同我講多次

「Jessie姐姐，妳唔好再咁樣，如果咁樣我先贏到妳嘅話，我會贏得唔開心」

「嗯...幫我多謝佢...」

自此之後，我每次溫書都會放筒糖係到，果然食糖係比食安眠藥好得多，除左令我重左幾磅之外...

Miss孔為左幫我地一班同學減壓，大約聖誕節前，佢特意安排左一個3日2夜嘅宿營俾我地。而個地點，就係我小學嘅畢業宿營果個營地，為左真係俾我地減壓，每個同學可以帶一位朋友或屋企人去，結果我帶左雪晴去，Ivana之前提議帶樂善堂班男仔去架，但係因為我地咁多女仔關係，所以我地否決左，但係一個宿營，冇男性幫手係好麻煩，所以我地就由Miss Lee做誘餌之下，呃左體育張sir去camp，冇辦法啦，想娶Miss Lee就先要過我地果關

「林雪凝!!!!!!」Ivana拎住條水喉追住我噴，佢真係傻傻地架!!!天氣咁凍仲玩水!!

「好啦!!!喂!!!!天氣凍呀!!!唔玩啦」真係走慢d都俾佢淋到全身都濕

「喂~Jessie~妳鋤dee俾我地大炒燴，妳唔接受懲罰點得架」

「咁妳地幾個想罰我d咩呀?」Ivana諗出黎嘅一定唔係好事

佢地成班將我安排左去廚房，要我煮飯俾全班食

「拿Jessie!!呢到有菜有蛋有蝦有肉有米有蠟，今晚果餐就交俾妳啦」

「我一個人煮呀??」

「如果唔想煮就俾錢啦，妳輸左成300隻，每隻一蚊妳都死啦」

「咁我煮啦...不過有冇人會幫我手呀?」

「冇」佢地成班好快就走晒

正當我煮得如火如荼之際，Miss孔就入左黎

「Jessie妳一個人煮得晒?」

「Miss孔?我一個人搞得掂架啦，妳可以放心」

Miss孔望實我煮飯嘅樣，我有d唔慣

「Jessie點解妳會學煮飯?而家好少女仔肯煮飯，我叫詩敏去學煮個公仔麵佢都話唔制，我真係擔心佢嫁唔嫁到人」

「其實係我鍾意煮飯者.....Miss孔我有樣野想問妳好耐，但又關於妳屋企嘅事...所以...」

「冇所謂，妳可以問架」

「其實有傳聞當年妳小產左幾次先可以生到Jasmine，妳當佢寶貝咁睇，妳舊年點解可以咁狠心趕佢出屋企?妳唔會擔心?」

「呵呵，我當然係知道個女會去邊我先會咁做。冇錯，當年我流產三次，我先陀到詩敏呢個女，陀佢果陣又有兩次差d小產，我食好多藥住好耐醫院佢先可以平安出世，就係佢差d小產，我先當佢如珠如寶，當年醫生話再小產就有機會生小朋友，我先生話生仔生女冇所謂，唔生都得，但係唔生小朋友，就唔係一個家庭，Jessie妳明唔明？」

「我明...所以我將來都想生小朋友」

「舊年，我一趕詩敏出門口果時，我就知道佢會去邊、搵咩人、去邊到寄居，果時佢只可以去契家姐到住，所以我先放心趕佢出門口」

「所以...Jasmine果排咁靜？」

「冇錯，妳都應該見過，佢放學果時有人接佢走啦，係咪？」

「係...有一大班男仔接佢走。但係點解Miss孔妳又會俾Jasmine繼續拍拖...仲...去人地屋企過夜?妳唔怕佢...」

「拍拖?詩敏冇拖拍喎，我只係知道佢有男仔追緊，妳幾時見佢拍拖？」

「暑假果陣...我補完習...同上次個DB仔..佢送我返屋企時，我見到Jasmine雙手撚實個男仔，仲挨住佢膊頭，然後聽到佢話...妳俾佢去人地屋企過夜...所以...我果陣有d擔心佢嘅」

Miss孔聽完之後就笑左出黎

「Jessie，妳真係好留意人，暑假果陣呢，詩敏的確係經常係外邊過夜，只不過佢去親都係同一地方，佢契家姐屋企，而果陣佢撚住果個男仔呢，係佢契哥」

「Jasmine契哥....即係...」

「妳唔記得左?妳三年級果時已經遇上佢同詩敏」

「當日...果個小妹妹就係Jasmine？」

「冇錯，所以詩敏契家姐就係程逸怡，佢契哥，就係妳一直好想見嘅人，程逸風」

「所以...舊年Jasmine就係去左HKU student hall到住？」

「冇錯，佢地兩姊妹近年來都係住係hall到，兩個除左讀書之外，都係hall到玩到癲晒，差d走到去墳場玩，我有時俾佢地激死」

「但係...佢地唔住返屋企？」

「呢層...關於佢地屋企私隱，我唔太方便講」

「我明嘅」

「至於詩敏呢，佢係有鍾意嘅男仔，呢層我好清楚，佢會唔會一廂情願或者佢最後嫁到俾人呢，就係睇妳啦Jessie」

「我?Jasmine終身幸福係我手上？」

「可以話係，我只可以透露咁多，將來佢要同妳爭嘅話，我會保持中立」

「Miss孔，妳唔好咁講，我自己都有鍾意嘅男仔...只不過係...咦...?」我望一望Miss孔，佢都知道我發現左果樣野

「Jessie妳係聰明女，妳應該知道左詩敏鍾意嘅係邊個」

我點一點頭「所以...上次係維園...佢想好快咁趕我走...就係唔想俾我同佢相認？」

Miss孔微笑對住我「後生仔女嘅野，我唔會干涉，妳就好好地跟我學煮飯啦」

「知...知道」

然後我終於見到我地學校歷來家政最強廚神，孔美玲老師嘅功力，佢係當年家政學會主席，每次家政都係滿分，犀利，刀法一流，雖然話近年請左姐姐幫手，係屋企少左落廚，但係佢嘅功力真係一流，可以話係廚藝高手。佢比我更快煮好飯，我由一個主廚，變為Miss孔嘅助手

然後，佢用獅哮功叫晒全班返黎食飯，大家望到一檯餸後，都對我報以佩服眼光

「唔好望住我呀...係Miss孔煮架」

「食完飯之後，妳地集體洗碗」

「洗碗？」大家都好驚訝

「定係妳地想做英文Past paper？」

食完飯後，大家都去晒洗碗

「估唔到恐怖雞煮野食咁好食喎」「咁妳係咪想日日佢煮俾妳食？」

「Jessie妳係咪受到恐怖雞廚藝上嘅真傳呀？」

「下...佢...有教我兩手嘅」

「Jessie妳同恐怖雞好好傾喎，莫非...佢想妳做佢新抱？」

「痴...痴線啦，咩新抱呀...Miss孔得Jasmine一粒女架咋」

「不過Jasmine唔係話佢自己有個契哥架咩？佢咪即係恐怖雞契仔囉，哦...Jessie妳唔乖啦，不知不覺咁樣攻陷左恐怖雞」

「邊...邊係呢...我連Jasmine個阿哥都未見過」

其實我係未見過而家嘅佢者，如果佢真係住我屋企附近，我都應該有機會係街上撞到佢嘅

聖誕過後，好快好快就到AL，代表會考即將來臨，study leave嘅時間，我每日都返學校圖書館自己溫書，唔知點解，我係慣左扎住對孖辮先溫到書，唔知你而家溫成點呢？

終於到會考啦，生死存亡就係呢個月內決定，每一次我都最早到試場，去搵地方放鬆自己。試場內有好多奇異嘅考生，有d著校服黎，話俾人知佢係傳統名校生，有d女仔就低胸短裙涼鞋黎，Ivana話呢個係擾敵戰術

英文、中文、數學已經考完，之後剩低d科目，唔會咁易鬆懈

就係考Bio果日，我好似見到佢，不過我同佢坐位相隔好遠，所以我唔可以太清楚咁望佢

LQ開始啦，其實唔係好難，我將我識嘅都答落去，去到第二條果時，我見到佢舉手。交卷?佢放棄左?原來唔係交卷，係比交卷更恐怖嘅加紙...

結果係LQ Paper I，佢加左5次紙...而MC果part一考完，佢好快就走左去

我同佢再一次相遇，係考Chem嘅日子，佢同以往一樣，都係不停加紙加紙再加紙

考完Chem之後，我就再冇見過佢。考晒試，我返左ba b到做暑期工，唔單止係我，ba b仲請埋Joanne同Ivana，等d正職助護可以係暑假期間放假陪屋企人。一時間，ba b間診所充滿左笑聲，我地3個連埋雪晴差唔多日日都搗亂咁滯。

終於到放榜日子啦，ba

b休診一日去陪我拎成績表。我地班應該冇人失手，但係有同學唔夠分，被迫轉去其他學校，有幾個轉左去男女校到讀，之後佢地講返，原來讀得更開心

「Jessie!到妳啦」

「係.....」

我係班主任手上接過成績單

Chin.Lang(A), Eng.Lang(syl.B) (A), Maths (B), Phy (A), Chem (A), Bio (A),
Comp studies (B), A.Maths (B)

5A3B....29分?

「Jessie妳差1分先可以拔尖呢」

「唔...唔緊要啦，可以係到留多兩年...我仲開心」

「Jessie!!!犀利呀!!!今年妳一定又係模範生啦!!!!!!」

Ivana唔係差我好多，27分，而Joanne就成為文科之后，28分

我地三個順利升F.6，Joanne同一班同學搞學生會，而我呢?我就繼續回家學會

當我地準備出去慶祝果時，Miss孔同Jasmine係校門出現

「Miss孔...」

「妳地三個27、28、29分，幾犀利㗎」

「Miss孔妳太過獎啦」我俾佢地兩個推左出黎

「Jessie，妳想唔想見佢？」Miss孔好仁慈咁講

「媽咪!!!」相反Jasmine就好反對Miss孔咁做

「唔好啦Miss孔，唔好要Jasmine唔開心啦，如果佢要搵我，佢一定會搵到」

「咁樂觀？」

「我就係鍾意佢呢樣野，佢係永遠都唔會放棄目標，如果...佢仲係好似小學果時咁嘅話，佢一定會搵到我，而且仲要係打晒鑼咁搵我」我微笑咁對住Miss孔

「咁可能妳開學時，會好開心啦」

我當時聽唔明Miss孔果番話，不過我見到Jasmine就鼓成左泡腮好不滿咁

「我地開學見啦，記住，套校服著好d」

「知道!!」

究竟，9月1號會係點呢？

結局

好快就到左9月1號，我一起身就眼皮跳，老一輩話左吉右凶，可能今日會發生d咩好事

晨早就俾雪晴叫醒左，我幫佢扎好對孖辮就等埋Ivana同埋Joanne，我地4個一齊返學

9月1日嘅校門，總係有恐怖雞係到啄人

我地係校門遇到Jasmine，佢好似唔太開心咁，我地5個一齊行入校門

「妳地5個!!!突擊檢查!!!」

「我都要呀媽咪?今朝已經俾妳轟炸左一次啦，放過我地啦，我地未食早餐呀...」

「邊個叫妳尋晚打機打到咁夜!!!5個唔check啦!!!入去啦」

估唔到Jasmine一句說話，我地就過左關

「Jessie姐姐」

「係!咩事呀?」

「我同妳...終於要爭啦」

「唔?佢冇搵我嗟」

Jasmine苦笑左一下「妳唔明都好嘅，一陣妳就會知」

然後Jasmine哼住Twins首女校男生咁走去買野食

我地幾個食好早餐，各自返課室時，已經見到校務處四周有同學尖叫，好興奮咁

返到6B班課室，大家都係熟口熟面嘅同學，不過只有29人

「乜我地會考好差咩?只有29個升到F.6」

「Jessie妳唔知咩?我地有外校生呀」

「外校生?有咩可能呀!!!」

「咁Mabel跟佢男朋友去加拿大讀書，多左個位出黎嘛」

講到咁上下，我地班主任Miss

Wong已經行左入黎，而外邊，有好多隔離班同學嘅尖叫。係我地班入邊，近走廊窗口同學都係到好開心同興奮咁叫

「我有冇眼花呀!!!」 「係真人黎架!!!!」

正當我地想去睇下咩事果陣，班主任黎到啦

「起立!」 「Good morning Miss Wong」

「(好彩係呢個後生Miss做班主任咋，如果係恐怖雞就死)」

「(恐怖雞係訓導主任，點會做班主任?不過Miss Wong總好過d老姑婆嘅)」

「首先恭喜每位同學過左會考一個難關，但係大家唔好自滿，大家面前仲有A Level一關要過，記住唔好鬆懈，知道未?」

「知道!!」

窗邊嘅同學仍然好興奮

「今年我地學校，妳地班會比較特別...」 Miss Wong講出左原因

「佢係我地班架!!!!」 「我係咪發緊夢呀!!!!好靚仔呀!!!!」

好靚仔?我同Ivana對望左一下

「女校男生?」 「唔會掛，可能係TB呢」

終於...

「各位同學，我地學校今年會有一位好特別嘅學生，佢係學校近20多年以來，第一位男同學。佢將會入讀我地班」

Ivana聽到之後，一向活躍嘅佢都呆左

「同學麻煩你入黎啦」

「係!」

把聲...好熟

然後有一個6呎高嘅男仔入左黎，佢著住白恤衫，灰色西褲，打上校tie，左袋掛上我地學校校章

佢一入黎班房時，已經有好多同學尖叫，仲有d雙眼閃閃發光。弊啦，佢地全部都係我對手啦

「同學，麻煩介紹下自己丫」

「大家好，我係呢間學校嘅女校男生，我來自樂善堂書院，我叫Anthony Ching, 程逸風」

終於，我同佢重遇了，初吻表白5年後，係一間女校入邊，我同佢再一次坐係同一課室。

今年，佢18歲，我17歲。出年佢19歲，我18歲時，正好係佢應承娶我嘅第十年。

---完---